

Primera carta del apóstol San Pablo a los Corintios

Pablo escribe a la iglesia de Corinto

1 ¹As Pábloat ba acu ayin carit uch cuihsuro. Ba coríntoin acu ayin cuihsuro. Asan Sir im ajc cut Jesucristo chihtá ehcuquib yehn áyjacro. Aját carit uchan Sóstenes jor cuihsuro. Sóstenes ey Jesucristo cutar is acu rabro. ²Ba Jesús chiwa Corinto pueblo cuitar itquin acu ayin cuihsuro. Ba Jesús chihtá cuitar Sir im uw yinjacro. Sir imatan baan ima uw cájacro. Bíyinatán Cara Jesucristo ojcor cónyatan, Sirat éyinan ima uw cájacro. Cajc birar bin, birar bin, bahnác cuitar bin uw eyta cájacro. Cahujín caquir eyta ba catum im eyta cájacro. Eyin acu cat, is acu cat Jesucristo eyan ijmár Cáraro. Ba biyin eyta cajac rehcayat, ba acu ayin carit uch cuihsuro. ³Sirat Tetát cat, Cara Jesucrístoat cat ba sehnác etar aját ba cuitar conro. Ba obir yajcayta acu ba ohbac ítayta acu conro.

Bendiciones por medio de Cristo

⁴Aját ba tamo séhwāran Sir quin wacaro: “Siru, bahat Jesucristo ajc cutar coríntoin racar rehjecro. Racar rehquít ay obir yajacro. Oquéy, bah ur ayro,” wacaro. ⁵Jesucrístoat ba racar rehquít, ba urá icar Sir ima urá bahnác wíjacro. Etarwan baatán ay síhwāro. Ay sínjacro. Ay siw̄ro. ⁶Récaji aját ba quin ehcujacro. Jesucrístoat ima urá wícata ehcujačan, ahra ba quin eyta bar wíjacro. ⁷Ba ur icar urán caba wíjacro. Eyta wícayat acsar ba bi táyotiro. Bahnacan chero. Ahajira Cara Jesucristo wic oceso ita rabar icrí táyotiro. ⁸Ey wic oceso tas, cabar tinic oceso tas, Jesucrístoat ima chihtá waca áytiro. Ba quin tan uc áyayqueyra. Etarwan eya wiquír ítitan, ba cat tayar batro. ⁹Sirat ba cayar yájtiro. Etarwan im ajc cut im waquj̄ Jesucristo ey owár ítayta acu ba cájacro. Baan eyta caquir car ba eyta ítayta acu im eyta tehmoti rehcaro.

Divisiones en la iglesia

¹⁰Rábinu, aját ba quin ajc uní cuitar wacaro. Cara Jesucristo ajc cuitar ba quin ajc uní cuitar wacaro. Aját waquíc rahcwi. Baan bahnáquinan urá istanác chaw̃i. Rahran, rahran técuati, bachuti ítuwi. Urán, chihtán istanác cuitar ítuwi. ¹¹Rábinu, Cloeinat waquít, baan rahra, rahra tecuac wacaro. Eyta cuácayat asan ba quin ajc uní cuitar wacaro. ¹²Eyinat waquít, ba cahujinat uchta waquíc wacaro: “As Pablo chíwaro,” waquíc wacaro. Cahujinat wacaro: “As Apolo chíwaro,” waquíc wacaro. Cahujinat cat “As Pedro chíwaro,” waquíc wacaro. Cahujinat cat “Asra Jesucristo ima chíwaro,” waquíc wacaro. ¹³Baat eyta waquíc cuar cuayar tew̃ro. Bahnaquin Jesucristo chiwa etar cahujinat chihtá ajquír, cahujinat chihtá ajquír bitách tew̃ajatro. Jesucristora bitách wáhw̃ajatro. As Páblora ba cuitar Sir tayar tunin ac caruc ojcor quejtiro. As chiwa yinín acuí ba rih sar síw̃tiro. ¹⁴Aját Crispo cat, Gayo cat bucatac bin rih sar síw̃jacro. Etan bin rih sar síw̃jacro. Eywan yarsa yajacro. ¹⁵Cuat uwa acsar acsar quir bin rih sar síw̃yeyra, uwat wacata óraro: “Pábloat ima chiwa chaquin acu iswan rih sar síw̃jacro,” wacata óraro. Eytara cuayar tew̃ata óraro. ¹⁶Aját awan seh̃ar ítitan, Estéfnas usar itquin cat síw̃jacro. Bucoy aját cahujín rih sar síw̃jácara, aját istiti bar tan chinjacro. ¹⁷Jesucristoat asan uw rih sar síw̃ín acuí cátiro. Cuatán ima chihtá uw quin ehcún acu as cájacro. Aját eyta ehcún yehnár cuít sínjaquinat tew̃ír éytara tew̃tiro. Cuat cuít sínjaquinat tew̃ír eyta tew̃yeyra uwat Jesucristo caruc ojcor quejequey tamo síhw̃ati jácata óraro. Cuat as tamo síhw̃ata óraro. Uwatan ey quejéc tamo síhw̃atieyra Sirat éyinra siwa báreyra.

Cristo, poder y sabiduría de Dios

¹⁸Jesucristoat isat tayar yajác tunin acu caruc ojcor quejecro. Eyta quejequey chihtá ehcwayat, cahujinat síhw̃aro: “Ey chihtá cuáyarcuano,” síhw̃aro. Cab oc icar beyata binat eyta síhw̃aro. Cuatán isat ítitan, ey chihtara cuáyari batro. Jesucristo caruc ojcor quejéc etar Sir urán ajean bahnaquin cuitatro. Is síujaquinat itit, éytaro. ¹⁹Sirat carit cuitar wacaro:


Urán cuít yinjaquin eyin aját sicor urá bár cháquinro. Urán bow̃an cuít binan aját sicor cuayir quir cháquinro.

Síratan eyta wac bahjacro. ²⁰Ahra urán cuít éyinra icúr acuí batro. Cuít sínjaquin cat icúr acuí batro. Chihtá ay tew̃quin eyin cat icúr acuí batro. Sir imát ítitan, ima tamo síhw̃ati binat imár chihtá cut bow̃ yajquíc cuar cuayir síhw̃aro. ²¹Uw Sir tamo síhw̃ati binat imár urá yehnari imár bow̃ yehnari Sir chihtá istá báreyra. Cuatán Jesucristo chinjác ojcor ehcwayat, ráhcuiquin eyin Sirat síwataro. Sir tamo síhw̃ati binat síhw̃at, Jesús chinjác chihtá cuayar ehcúc síhw̃aro. Eyinat cuayar síhw̃ac cuar chihtá ey cuitar uw síwataro. Sir ima urá cuít bi yehnár eyta siwin waquír chájacro. ²²Judíoinat wacaro: “Býinat icúr bár sicar bin Sir urá cut yajcayat, isat ey tamo síhw̃anro. Sirat ey ayjac síhw̃anro. Ey tamo síhw̃ar éyinat

waquey rahcuinro,” wacaro, judfoinat. Cuatán griégoinat wacaro: “Bíyatan urán cuít tew̄yatan, isat ey chih̄tá rahcuátaro,” wacaro. ²³Cuatán ísatra Jesucristo is siwin acu caruc ojcor chinjác chih̄tá ehcuro. Ey ehcwáyatan judfoinat chih̄tá ey quehsuro. Griégoinatra sih̄w̄at cat ey chih̄tá cuáyatro. ²⁴Cuat Sirat judfoin sícara bin griégoin sícara bin cahujín cácaro. Sirat biyin cácaýatan, éyinat ítitan, Jesucristo chinír cuitar uw síujacro. Sir ima urá cuitar camur cuitar uw siwin chinjacro. ²⁵Uwat Sir chih̄tá cuayar seh̄w̄a cuaquir, chih̄tá eyan uway cuitro. Siran cámuran conu seh̄w̄a cuaquir Sir cámuran uway cuitro.

²⁶Rábinu, Sirat ba cájacro. Baan bitara bin sicar cájactara isat ey sih̄w̄ataro. Sih̄w̄atan, ba uw chih̄tá cuitar urán cuít bin sicar birách cátiro. Baan carin sicar, carin wihnín sicar Síratan birách cátiro. ²⁷Cuatán urá conu éyinra Sirat ricá cuít cájacro. Uw urán cuít éyinra sicor uw ubot cuayir jaquin acu urá conu eyin cájacro. Uw chiwa

éyinra Sirat cájacro. Carin éyinra sicor cuayir jaquin seh̄w̄ar cat chiwa eyin cájacro. ²⁸Sirat cuayin bin, oya bár bin cájacro. Carin, oyin sicor uw ubot cuayir jaquin seh̄w̄ar cájacro. ²⁹Uwat bahnáquinat Sir cucajá ácatan ajc chiw̄ín acu urá conu eyin cájacro. Cahujinat “asra urán cuítrora” wac ayti acu urá conu bin cájacro. ³⁰Ba urá conu cuara, Sirat Jesucristo ima jor ur istanác it áyjacro. Ey jor ítyatan, eyat ba cat, as cat urán cuít wícaro. Sir im urá wícaro. Jesucristo chih̄tá cuitatra, Sir imát cat is cuitar tayar bár chácáro. Isan Sir im uwa chácáro. Is síuro. ³¹Eyta cuácayat Sir carit cuitar wacaro. “Bíyatan ima ojcor ay waquín seh̄w̄ayatan, éyatan bar wacátaro. ‘Ajmár Cara Jesucristoat caba yajacro,’ wacátaro.”



(1 Corintios 1.23)

El mensaje de Cristo crucificado

2 ¹Rábinu, asa ba quin bicayat, aját urán cuít bin tew̄ír éytara tew̄ti rehjecro. Sir chíhtara éytara ba quin ehcútiro. ²Ba owár ita rabar as ur icar seh̄w̄ajacro. Aját chih̄tá istanác ehcún seh̄w̄ajacro. Eyta seh̄w̄ar, ey ehcujacro. Uwat Jesucristo caruc ojcor quejequey chih̄tá ehcujacro.

Baat ima Jesucristo chihotá istir bi istayta acu eyta ehcún séhw̄ajacro. ³Ba owár ítyatan as urá conu jájacro. Urá conú jácayat as ay wini rehjecro. Ayú rehquít as tiuír tiujacro. ⁴Etarwan ajatán urán cuít binat tew̄ír éytara téw̄tiro. Urá cuít binat siw̄ír éytara síw̄tiro. Cuatán Sir Ajcan Cámuran Eyatra as cuitar síw̄jacro. Ey ajc cut ehcujacro. Eyta ehcwayat baat itchacro. ⁵Aját urá conu binat ehcúr eyta ehcujacro. Eyta ehcwayat baat urá cuít bin chihotá cuitari Sir tamo síhw̄atiro. Cuat Sir im urá cuitatra ey tamo síhw̄aro.

Dios se da a conocer por medio de su Espíritu

⁶Eyta cuat urá cuít binat tew̄ír eyta, isat cat eyta tew̄ro. Sir chihotá ay cajac bin quin isat eyta tew̄ro. Eyta cuar chihotá eyra úwayra batro. Uw cárinay batro. Carin éyinra yájcajareht sicor bár chácataro. ⁷Chihotá aját ehcúqueyra anto ehcuti binro. Chihotá ey Sírayro. Anto cajc uch cut uw bár cuat chihotá eyra Sir ima urá cuitar seh̄war chájacro. Isan ey owár cuacúr chácayta acu eyta chájacro. ⁸Uw cárinatra ey chíhtara síntiro. Eyinat ráhctiro. Chihotá ey rahjaquir waquít, sínjaquir waquít, éyinat Jesucristo caruc ojcor quejti jácata biro. Caran cuít yehnata biyan yauti jácata biro. ⁹Sirat carit cuitar wacaro:

Anto ub cuitar istiti ey, anto cucáj cuitar rahcti ey, anto urá cuitar séhw̄ati ey, ayan cuít ey Sirat im uwa sehnác bin quin wiquin acu órojocro.

¹⁰Eyan Sirat is quin bar ehcujacro. Ima Ajcan Cámuran Ey quin ehcú áyjacro. Sir Ajcan Cámuran Eyat bow̄ yajquír bahnác bar itro. Sirat ur icar séhw̄aquey cat itro.

¹¹Uwat ima urá cuitar séhw̄aquey cahujinat bitách ístajatro. Cuat seh̄wac im ey úratra bar ístátaro. Eyta cat Sir urá cuitar séhw̄aquey rehratí ístajatro. Cuat Sir Ajcan Cámuran Eyatra itro. ¹²Sirat is ur icar Ima Ajcan Cámuran Ey chájacro. Ey chájaqueyan cajc uch cut bini batro. Cuat Ajcan Cámuran chájaqueyan Sir im owár binro. Sirat is quin icúr wíjactara ey istayta acu Sirat is ur icar ima Ajcan Cámuran Ey racar chájacro. ¹³Isat ey chihotá ehcuro. Isat ba quin ehcúqueyra uwa imár urá yehnár sinjac bini batro. Cuat isat ehcúqueyra Sir imayro. Sir Ajcan Cámuran Eyat is síw̄jaquey ba quin acsar ey ehcuro. Biyin ur ícara Sir Ajcan Cámuran Ey chácayatan, eyin quínoan ísatan Sir chihotá cuít bi ehcuro. ¹⁴Cuat biyin ur ícara Sir Ajcan Cámuran Ey chati cuácayatan, éyinatán ey chihotá bitách ístajatro. Chihotá ey bitách sínajatro. Sir Ajcan Cámuran Eyat ur icar witi étara, bitách sínajatro. Cuat éyinat séhw̄atan, cuayir chihtaró. ¹⁵Ey caquin acu ey sinin acu Sir Ajcan Cámuran Eya ur icar chácataro. Biyin ur icar Sir Ajcan Cámuran Ey chájactara, éyinat bahnác bitáratara ístátaro. Biyan áytara biyan ay bártara ístátaro. Cuatán cahujinat eyin urá bitáratara ístajatro. ¹⁶Sirat carit cuitar uchta wacaro:

Rehratí ima urá yehnár Sir urá istá báreyra. Rehratí Sir siw̄a báreyra. Cuatán Jesucristo seh̄war eyta isat cat im eyta sihw̄an acu chájacro.

Compañeros de trabajo sirviendo a Dios

3 ¹Rábinu, aját ba owár ita rabar ba quin conu ehcujacro. Ba quin cuít ehcún yajquít cat, baat ay cati yajacro. Etar ur icar Sir Ajcan Cámuran Ey anto chati bin quin ehcúr eyta ba quino cat eyta ehcujacro. Sir uw bár bin quino ehcúr eyta ba quino cat eyta ehcujacro. Baan buwáchcuaran wanro. Sir Ajcan Cámuran Ey chihtá cuitar ítiti rehquít buwachcuar urán wanro. ²Ba buwachcuar urán wan etar, aját ba quin cuít siw̄ti yajacro. Buwachcuar yayín acu ira ubir wícajatro. Sutá wícataro. Ba cat éytaan wanro. Ba éytaan wan etar aját chihtá cuít siw̄ti yajacro. Baat chihtán cuít bi caba ráhcuajar etar conu síw̄jacro. Ba récaji chajac eyta áhajira im éytaro. ³Baat cat Sir chiwa bár binat yajquír eyta yajcaro. Ba rahra rahra técuaro. Ba rahra rahra tamo cuayin síhw̄aro. Ur icar Sir Ajcan Cámuran bár binat yajquír eyta, baat cat eyta yajcaro. ⁴Istiyát “Asra Pablo chíw̄aro,” wacaro. Istiyát “Asra Apolos chíw̄aro,” wacaro. Eyta waquír, eyta ajquír wahw̄utra, baat Sir Ajcan Cámuran Ey chihtá cati binat tew̄ír eyta tew̄ro.

⁵Eyta waquíc cuar as Pablo cat, Apolos cat, carin cuít bini batro. Isan Sir cacmín étacro. Isat ba quin Sir chihtá ehcwayat, baat ey cájacro. Sir imát ba quin ehcú áyatra, baat bar cájacro. Is ajc cutari cátiro. Isan cacmín rehquít, Sirat yajc áyjaqueya yajacro. ⁶Aját ba quin Sir chihtá récaji ehcujacro. Aját ehcujác yahncút Apolosat acsar síw̄jacro. Isat yajaquey cacminát yajquír eyta yajacro. Cacm istiyát ira ricaro. Ey yahncút istiyát rih chácáro. Uwat eyta yajc cuar ira rijaquey Sir imát yehn ayro. Eytaan wan aját cat Apolosat cat siw̄ic cuar, Sir ima chihtá cuitar baatán ey chihtá cájacro. ⁷Uwat ítitan, riquib cat, rih chaquib cat cárini batro. Chíw̄aro. Eytaan wan as cat Apolos cat cárini batro. Isan chíw̄aro. Cuatán caran Sir iman eyro. Eyat ba quin chihtá cac ayjac étarwan cáraro. ⁸Riquib cat rih chaquib cat imár owara eyta as cat Apolos cat ijmár owáraro. Isat bita yajáctara ey tehmár Sirat is obir yajcáyqueyra. Rijác tehmár, rih chajac tehmár, carat tunir eyta Sirat isan eyta obir yajcáyqueyra. ⁹Etarwan isan Sir cuitar yájquinro. Uw cacminát cara chihtá cuitar chi yajquír eyta, isat Sir ima chihtá cuitar ba siw̄ro.

Bara Sirat ítitan, ima úbachan wanro. Uw cacminát cara chihtá cuitar ubach tuw̄ír eyta aját cat eyta Sir ima ajc cuitar ba siw̄ro. ¹⁰Uwat ubach tuw̄ín cuácayat teban récaji ócuaro. Teban récaji ocuár eyta aját cat ba quin Sir chihtá récaji ehcujacro. Sirat as urán cuít wijac cuitar ba quin ehcujacro. Jesucristo is cuitar tayar tunin chinjác chihtá ehcujacro. Uwat teb récaji ocuár cuitar acsar ubach tuw̄ro. Eytaan wan aját récaji ehcúr cuitar istiyát acsar siw̄ay yehnjacro. Siw̄quib eyat yají síw̄ataro. ¹¹Teba ocuajác ey cuitar uwat bucoy teb istiy ocuár cuitar bitách túw̄ajatro. Cahmor ocuajác ey cutara tuw̄átaro. Eyta cat aját chihtá récaji ehcujaquey, acsar im ey cuitara síw̄ataro. Chihtá istiyár éhcwajatro. Chihtá téhmojotro. Jesucristoat uw siwin ac chinjác chihtá téhmojotro. Acsar cat im

ey ojcor síw̄ataro, uwan Sir chiwa yinayta acu. ¹²Ubach tuw̄ín acu récaji teba ocuátaro. Ocuár cuitar acsar tuw̄átaro. Acsar tuw̄yat, istiyát ayan cuít bi tuw̄ro. Cuatán istiyát cuayar tuw̄ro. Eytaan wan, aját ehcujaquey cuitar acsar siw̄yat, istiyát ayan cuít bi siw̄ro. Cuatán istiyát cuayar siw̄ro. Biyat ayan cuít bi siw̄yat, ey chih̄tá óroan wanro. Yera plátaan wanro. Ac rayan wanro. Cuatán biyat cuayar siw̄yat, ey chih̄tá cárucuan está binan wanro. Tihw̄án wanro. ¹³Eyinat chih̄tá bitara bi síw̄ jactara uwat istáyqueyera. Cabar tinic cab cucayat istáyqueyera. Cabar tinic cab cucayat ocat ubach wahnár éytaan wanro. Ubach wahn̄yat, oro cat, yera plata cat, ac raya wahn̄ti im eyta rehcaro. Cuatán caruc cat tihw̄á cat sicor bár chácáro. Uw chih̄tá siw̄ jac cat éytaan wanro. Chih̄tá ay bi síw̄ jactara, teh̄moti bah̄nti im eyta reh̄cáyqueyera. Cuatán cuayar síw̄ jactara, sicor bár chácáyqueyera. ¹⁴Uwat síw̄ jaquey teh̄moti bah̄nti im eyta reh̄cayat, Sirat uw eyin quín sicor túnayqueyera. Eyin obir yajcáyqueyera. ¹⁵Cuatán uwat síw̄ jaquey sicor bár chácayat, Sirat uw eyra etach obir yajca báreyra. Etach obir yajti cuar uw im eya síwayqueyera. Ubach cat oya cat ray cat oca cut bahnác wahn̄ic cuar, uw eyra echí sera waar eyta, uwat síw̄ jaquey sicor bár chaquic cuar, uw eyra Sirat echí síwayqueyera. ¹⁶Baan Sir ima úbachan wanro. Ba ur icar Sir Ajcan Cámuran Ey chajac etar baan Sir ima úbachan wanro. ¿Baat chih̄tá eya istiti waátaqui? ¹⁷Sir úbachan im istir acuro. Sirat ba imáy chaquin cájacro. Eyta chih̄tara istiyát ba quín Sir chih̄tá waca áyatra, Sirat ey cuécwayqueyera. Cab oc icar téyqueyera.

¹⁸Bíyatan ima tamoan “Asa cahujín ubot urán cuít,” séhw̄ayatan, sicor cahujín ubot urá conu chaw̄ i. Síratan ey ur icar ima urán bow̄an wícayta acu eyta chaw̄ i. ¹⁹Imár tamo urán cuít sihw̄ac éyinan, Sirat ítitan, eyin urán cuáyitro. Sirat carit cuitar wajacro: “Urán cuít binat cahujín cayar yajquín yehnyat, Sirat sicor cat imár cayar yajc ayro.” wajacro. ²⁰Uch cat wajacro: “Sirat ítitan, urá cuít binan icúr acui batro,” wajacro. ²¹Eyta cuácayat, uch waquíc etwi: “As cárara ba cara urán cuitro,” waquíc ey etwi. Cuatán Sirat ba acu bahnác chájacro. ²²As Pablo cat, Apolos cat, Pedro cat, Sirat ba acu chájacro. Cajc uch cat, ah uch riy cat, yahncút rícara cat bahnacan ba acu chájacro. Ba ac ay yajquín seh̄w̄ar, ba estají itin acu cat, chinín acu cat waquíu chájacro. ²³Acsatra ba Jesucristo ácuacuano. Ey acsar Jesucristo eyan Sir ácuacuano. Eyta bira behmár cahujín cuít sihw̄ac ey etwi.

El trabajo de los apóstoles

4 ¹Uwat is tamo séhw̄actara, uch séhw̄ata binro: “Eyinan Jesucristo cacminró,” séhw̄ata binro. “Eyinat Sir chih̄tá récaji ehcuti bi ehcún waquíu cájacro,” séhw̄ata binro. Is tamoan eyta séhw̄ata binro. ²Uwat séhw̄atan, biyan cara cuitar cacmín ayquib chácayatan eyat ima cara chih̄tá wácati yajcátaro. ³Aját Sir chih̄tá siw̄ jac ques uwat tew̄yat, as ayuí batro. Aját teh̄moti síw̄ ictara, teh̄mór síw̄ ictara istín ac as urá wahityat, as ayuí batro. Baátara, cahujíntara as urá wahitay yinyat, as ayuí batro. Aját bitara síw̄ ictara ajmarát caba ístajatro. ⁴Ajmár séhw̄atan, aját ay siw̄ro. Eyta cuaran “Aját Sir ub cahmor ay siw̄ro,”

bitách wácajatro. Aját bitara síw ictara, Cara Jesucristoan wahítquibro. ⁵Eyta bira Cara Jesucristo anto witi cuat, “Uyat ay síw tiora,” wati jawí. Cara Jesucristo sicor uch cut wiquír car, uwat imár ur icar síh wájacan bar ehcwáyqueyra. Cahujín quin ehcuti séh wájacan bar ehcwáyqueyra. Eyta cuácayat, istiyát bitara síw jactara, istiyát bitara síw jactara, ey bahnác bar ehcwáyqueyra. Eyta ehcwáyatan Sir imát uw istiy ojcoran, uw istiy ojcoran ay wacáyqueyra.

⁶Rábinu, aját cat, Apolosat cat yajác ey ehcún cuihsuro. Isat yajác eyta baat cat eyta yajcayta acu cuihsuro. Sir chih tá cuihsú báhjaquey acsar chih tá istiy yajti ac ey cuihsuro. Ba istiyát “As caran urán cuitro,” wati acu cuihsuro. “Ba caran úrara cuáyatrora,” wati ac cuihsuro. Rahra rahra éytara wati ac cuihsuro. ⁷Ba bitara reht behmár urán cuít síh wáqui? Sirat ima chih tá cuitar ba quin urá wíjacro. Sirat wítiir waquít ba urá bár rehcatáro. Eyta bira behmár chih tá cuitar urán cuít yinjaca séh wáti jawí. Behmár bahnaquin cuitatra síh wáti jawí. Sir imát ba quin urá rácatra wítiora, séh wáti jawí. ⁸Behmár tanra caba sinjac síh wáro. Rayin oyin yarís yinjác síh wáro. Carin cuít yinjác síh wáro. Behmaran carin yinjác reht is ajcá ji bétiro. Behmár tanra eyta síh wáro. Baan carin cuít yinjaquir waquít is catum ba owár uw ayin yinátaro. ⁹Cuat aját séh wátan, isra Sir uw cárinan cuáyinir yin áyjacro. Uw cac cahmar ur ay bár bin yawwir eyta is cat éytaan wan ruh wúro. Bahnáquinat wahitín acu is ruh wúro. Sir cuacúr cacminát cat, uwat cat is wahitro. ¹⁰Isan Jesucristo chiwa etar, uwat is ítitan, cuáyitro. Cuatán baat tan síh wát, behmár Jesucristo ajc cut urá cuít yinjác síh wáro. Uwat ítit, isra urán cámuran che bini batro. Cuat behmáratra urán cámuran cuít síh wáro. Uwat ba ójcotra ay tew íc síh wáro. Ba tanra eyta síh wáro. Cuat uwat is ajcá bár chácáro. ¹¹Ahajira isra yayiro. Isra cuc wíniro. Isra oya batro. Isra uwat tajcro. Isra ubach batro. ¹²Isat íjmár at cut canar yajcaro. Uwat is cahmí icar ahsín téw yatra, isat rahra eyin quin “Sirat ba obir yajwí,” wacaro. Jesucristo chih tá ques is ruh wúyat etiti tan úcaro. ¹³Is cahmí icar sucuar téw yatra, rahr owatra ísatra eyin iwón yajcaro. Isra rurumán wan yinjacro. Bahnáquinat síh wátan, isan rurumán wan waajacro. Uwat is tamo eyta séh wáro.

¹⁴Behmarat tayar yajác ques áywini rehcayta acui eyta cuihsútiro. Ehúr chácayta acui cuihsútiro. Cuat uwat sasá quin ajc uní cuitar waquír eyta, ba quino cat eyta ajc uní cuitar waquín acu cuihsuro. Ba racar rehtra eyta cuihsuro. ¹⁵Ba quin Jesucristo chih tá síw quinan ricán toro. Cuat tetír éyinra etach batro. Aját récaram ba quin Jesucristo chih tá ehcujác etar asan ba acuan tetír waajacro. ¹⁶Eyta bira aját ba quin ria racaro. Aját yajc eyta baat cat eyta yajwí. ¹⁷Eyta yajc ayin ac aját ba quin cuwín Timoteo bar áyjacro. Timoteo ey aját rácatro. Sirat ítitan, Timoteo as acuan wacjitró. Eyat as chih tá wácatiro. Timoteoat ba quin cur, ehcwáyqueyra. Ajmarát Jesucristo chih tá cutar yajquíc chih tá ehcwáyqueyra. Aját cajc bahnác cuitar, chih tá ey Sir uw bahnaquin quin síwro.

¹⁸Ba cahujinat imár tamoan urán cuít síh wáy yinjacro. Asra ba quin cúwajar síh wár eyta síh wáy yinjacro. ¹⁹Eyta síh wá cuar, Sirat ajc waacáyatra as in bar cuwinro. Erar cur car aját cahujín eyin urá wahitinro.

Urán bítatara aját eyin wahitinro. Eyinra téw ícan cuitro. Cuat éyinat Sir urá cuitatra icúr yajcátatara aját wahitinro. ²⁰Uwatan cuw cut tew ír cuitara Sir chihtá yajca báreyra. Cuat Sirat ur icar wíjaquey cuitatran Sir chihtá yajcáyqueyra. ²¹Eyta bira as ajca rahcwi. Ey ráhctieyra, ¿Aját tecuay béjequi? Cuat ráhcyatra ohbac tew ay bétaro. Rahra rahra sehná reht turti tenátaro.

Se juzga un caso de inmoralidad

5 ¹Uwat as quin baat yajquey chihtá ojcor wacaro. Ba ojcor eyta wacayat, as ojc sijacro. Uwat waquí, ba sicar bin istiyát isár yajcaro. Ima tet wiya jor isár yajcaro. Eyta isár yajcayat, ay baran cuitro. Sir tamo síhwiati binat cat éytara yajca báreyra. ²Ba sicar bin istiyát eyta yajc cuar, behmár úrara bahnaquin cuitar síhwiaro. ¿Ba bitara reht eyta síhwaqui? Eyta síhwayat ay batro. Behmaran ayan cuitra síhwiati cuar cue rehcata bin yajacro. Isár yájqueyra baat ay bo teta bin yajacro. ³Ba istiyát isár yajcayat ojcor asan cajc istiy cuitar cuar cuécuro. Asra cajc istiy cuar ajmár ur ícatra ba tamo séhwiaro. Eyta sehwar isár yajaquey urá wahitchacro. Tayar itchacro. Asan ba owár chaquir car istata eyta aját ey urá eyta itchacro. Eyta istír eyta yajác ques cuecun wac áyjacro. ⁴Eyta yajác ques uchta yajwí. Ba Jesucristo tamo síhwan acu owár sécuayat, Jesucristo ima ajcan urán ba ur icar chácataro. Eyta sécuayat aját sehwar eyta baat cat eyta síhwiataro. ⁵Eyta sécuayat, tet wiya jor isár yájqueyra Sisráam at icar Satanás at icar wiwí. Eyta wíccayat Sisramat Satanasat ey sibár ruhwiátaro. Cuatán Jesucristo cajc uch cut sicor wiquí cab cucayat, ser ey ajca síwayqueyra.

⁶Behmár urán cahujín cuít síhwayat ay batro. Cuis istán binat ur ay bár yajquíctara, cahujinat cat im eyta yajquíc sínataro. Uw eya buc réhquiban wanro. Buc rehquib conu cuitar panan cuít bi buc rehquí eyta, istán bin oquís uw quir binat ur ay bár yajcáy yinátaro. ⁷Eyta bira ur ay bár yájqueyra ay bo tewi. Eyta ayat baat ur ay bár yajquíc sina báreyra. Baan ur ay bár yajquín acui batro. Jesucristo isat tayar yajác bár chaquin acu chinjacro. Bachan chihtá cuitar isat tayar yajác tunin acu obas yawwir eyta, Jesucristo cat isat tayar yajác sicor tayar bár chaquin acu chinjacro. Etarwan is ur ay bár yajquín acui batro. ⁸Eyta bira isan Jesucristo chiwa rehquí, ur ay bár yajquíc etátaro. Is cohtinát buc réhquiban watar ter eyta, isat ay bár yajquíc etátaro. Is cohtinatán panan ima cohjocro. Buc réhquiban bár cohjocro. Cohtinatán pan buc réhquiban bár bi coh eyta isat cat urá istanác cuitar ur ay yajcátaro.

⁹Récaji aját chihtá cuihsúr ba ac áyjacro. Aját “Isarin owár ténati jawí,” wac áyjacro. ¹⁰Cuat aját “Isarin owár ténati jawí,” wacayat, aját Sir chihtá cati bin ojcori wátiro. Cati bin cahujinat isár yajcaro. Cahujinat es yajcaro. Cahujinat bes yajcaro. Cahujinat sirir órojoquey tamo síhwiaro. “Eyin quínora ténati jawí ira” wátiro. Cuat eyin quínora ténajarir waquí behmár istír ajquí ítataro. Cuat isan ajquí itin acui batro. ¹¹Cuat Sir uw owár bínatra ur ay bár yajcayat, eyin quin ténati jaquin wajacro. Sir uw sicar binat isár yajcata óraro. Istiyát cahujinat

racar isota óraro. Istiyát sirir órojoquey ojcor conata óraro. Istiyát istiy jor, istiy jor uw ríota óraro. Istiy simat yehna yarata óraro. Istiyát bes yajcata óraro. Aját Sir uw sicar binat eyta yajquíc ey ojcor waquír áyjacro. Eyta eyin owatra ira cat yati acu cuihsúr áyjacro. ¹²Cuatán Sir chihotá cati bin ojcotra aját cuihsún acui batro. Aját éyinat ay bár yajquíc ques cuécun acui batro. Cuat Sir uw sicar binat ay bár yajquíc taca, baatán eyin técuataro. ¹³Eyin cuécwataro. Cati binra Sir imát tayar yajác ques cuécwayqueyra. Cuatán ba owár bin ay bár yájqueyra behmarat ay bo tewi. Sir carit cuitar eyta waquír chájacro.

Pleitos delante de jueces que no son creyentes

6 ¹Ba rabat ba tayar yajcayat, ¿bitara reht Sir tamo síhwāti bin cac cahmar tayar chiqui? Cuatán Sir uw cac cahmar chiata binro. Sir tamo síhwāti bin cac cahmatra chícayat, ¿Sirat ba cuécwajaqui? ²Uch síhwāwi. Cabar tinyat Sir uwat bahnaquin urá wahitín binro. ¿Baat chihotá ey istiti waátaqui? Eyta wahitín bin etar récaji tayar conu yajquey tamo cat síhwátaro. ³Cabar tinyat, isat Sir cuacúr cacmín urá cat wahitín binro. ¿Chihotá ey istiti waátaqui? Eyta wahitín bin etar cajc uch cuitar cat tayar conu yajaquey tamo cat yarsa síhwátaro. ⁴Behmár owár tayar chífn síhwāyatan, ¿cahujín cac cahmar bitara reht chiqui? Cahujín eyin Sir uwat ítitan, ur ay batro. Eyta bira eyin cac cahmar Sir uwa imár owár tayar yajaquey chiti jawī. ⁵Aját ba quin uní cuitar wacaro. Ba ayú rehcayta acu wacaro. Ba rabin cac cahmar tayar chífn cat, uw jiro. Ba sícara bin urá to bin chero. ⁶Urá to bin che cuar, baan Sir tamo síhwāti bin cac cahmar técuaro. Jesús chiwa bár bin cac cahmar rabin owár rahra rahra tayar ques técuaro. ¿Bitara reht eyin cac cahmar técuauqui? ⁷Eyta bin cac cahmar técuajar bin técuaro. Tayar eyra chiti etata binro. Istiyát ba tayar yajcayat, Jesús chiwa bár bin cac cahmar técuati tan úcayatan ayro. ⁸Eyta yajcata bin cuar behmarat cat tayar yajcaro. Istiy cayar yajcaro. Behmár rab ohnor bes yajcaro. ⁹Uch síhwāwi. Urá ay bár éyinra Sir jor itay cuwa báreyra. ¿Chihotá eya istiti waátaqui? Behmáratrun cayar yajti jawī. Isár yajc eyin cat, sirir órojoc tamo síhwāc eyin cat, cahujín wiya bes yajc eyin cat, ser ima serin owár isár yajc eyin cat, ¹⁰bes yajc eyin cat, bahnác racar isóc eyin cat, simat yiníc eyin cat, uw rioc eyin cat, cayar yajc eyin cat, éyinra Sir jor ítayra béyajatro. ¹¹Ba cahujín cat récaram urán eyta chájacro. Eyta cuar, ba urá ay tehmojocro. Ahra ba Sir im uwa chájacro. Cara Jesucristo ima ajc cut Sir Ajcan Cámuran Ey sicor tayar bár jájacro.

La santidad del cuerpo

¹²Uwat wacaro: “Ícúr bi yajquín acu bach batro,” wacaro. Eyta wacayat uní wacaro. Uní waquíc cuar, ícúr bi bahnác ohbac yájcajatro. “Ícúr bi yajquín acu bach batro,” waquíc cuar, asa bitar utar icar ay cun batro. Aját bi yajquíc étajar rehcatatara, aját récaji eyta yajti cháquinro. ¹³Uwat wacaro: “Atucui icar chaquin acu ira chájacro,” wacaro. “Ira yayín acu atuc cat chájacro,” wacaro. Cuatán Síratán ira cat, atuc cat sicor bár jácayqueyra. Cuáyinat wacaro: “Isár yajquín ac sibár

chájacro,” wacaro. Eta cuar cuayir tew̃ro. Sibár isár yajquín acui batro. Cuat sibár tas cuar isat Cara Jesucristo tamo seh̃w̃an acu chájacro. Rahra cat Jesucristoat is sibirá obir yajquín acu waquíř chájacro. ¹⁴Cara Jesucristo chinjác cuar Sirat eyan sicor estají yehn áyjacro. Jesucristo yehn ayir eyta is cat tinyat sicor eyta estají yin áyayqueyra. Ima urá cuitar is estají yin áyayqueyra. ¹⁵Uch síhw̃awi. Behmár sibirán Jesucristoayro. Istiy sibár cat, istiy sibár cat, Jesucristoayro. ¿Chih̃tá eya istiti waátaqui? Eyta cuácayat ¿baatán Jesucristo sibirá wah̃w̃ úř car isarin owár chácata síhw̃aqui? ¿Ba tanra eyta síhw̃aqui? ¹⁶Sirat carit cuitar wacaro: “Buc owár cámyatra sibár istanacan wan waacaro.” Etarwan Jesucristo uwan isarin jor camyat buc owár isarin waacaro. ¿Baat chih̃tá eya istiti waátaqui? ¹⁷Cuat Jesucristo icar urá chácayat, Jesucristo joran urán istanáć wáyqueyra.

¹⁸Eyta bira isari yajti jaw̃i. Yehw̃ ti bin catoti jaw̃i. Eyin cátoyeyra, eyin owár cámyeyra, ¿behmár sibár rúhw̃ajaca? Baat istiy tayar yajcayat, behmár sibatrá ruh̃w̃ úřtiro. Cuat isár yajcayat, behmár sibár ruh̃w̃ áyqueyra. ¹⁹Ba cuaya sinti jaw̃i. Ba sibár Sir Ajcan Cámuran Ey úbachro. Síratan ba tan sar ima Ajcan Cámuran itin ac waquíř chájacro. Ba behmaray batro. ²⁰Baat tayar yajác Sirat tunir cuitar imáy jaquin acu ba bar cájacro. Eyta bira uwat Sir tamo ay seh̃w̃an ácuán sibirá anto yarti cuácayat ay ítataro.

Consejos sobre el matrimonio

7 ¹Baat as acu carit cuihsúr áyjacro. Chih̃tá cahují tayon acu cuihsúr áyjacro. Chih̃tá ey istiy ojcor wacaro. Sératan wiw̃ áraquin catoti jácayatan yársaro. ²Eyta cuar cahujinat cat cahujinat cat isár yajcaro. Eyta bira ser istiy cat istiy cat imár wiya jor ítata binro. Wiw̃ á istiy cat, istiy cat imár ra jor ítata binro. ³Ra ima wiya jor cuic cut questa camata bin camátaro. Rahra cat wiya ima ra jor eyta camátaro. ⁴Wiw̃ á ra ji ey sibirá im ístirayi batro. Cuat ey sibár raayro. Ra sibár cat im ístirayi batro. Cuat ey sibár wíyayro. ⁵Eyta bira rahran rahran “Bah jor cámtirora,” wati jaw̃i. Cuat Sir tamo seh̃w̃an acurun, Sir ojcor conín acurun cab istiy cab istiy buc owár camti bachwata óraro. Buc owár eyta sihw̃ar, cab istiy eyta ohbac bachwátaro. Eyta cuar buc owár camti bachur car ífchareht bucoy buc owár camwi. ¿Bucoy eyta cámtieyra, Satanasat ba cayar yájcajaqui? ¿Isár yajc áyajaqui?

⁶Ba wiya yehw̃ inan acu bar ajc waátaro. Eyta cuar aját ba quin “yehw̃ ira” wátiro. ⁷Cuat asa wiya bár itir eyta bahnáquinan eyta ityat, asan ahñi rehcatáro. Cuat istiy quin ur istiy, istiy quin ur istiy, istiy quin ur istiy, Sirat wíjacro. Eyta wícyat cahujín wiya bár ítataro. Cahujín wiya ji ítataro.

⁸Aját yehw̃ ti bin quino cat sácajaquin wiya quino cat uch wacaro. As istir itir eyta, ba cat eyta ítyatan ayro. ⁹Cuat wiya racar réhctara wiya yehw̃i. Ra racar réhctara, ra chaw̃i. Wiya yehw̃yat, ra chácayat, ahsinra batro. Cuat yehw̃ti bi jor buc owár cama racar isóyatan eyrun ahsinro.

¹⁰Wiya yehw̃ jaquin quin ra chájaquin quin uch wacaro. Ajmarati wátiro. Cara Jesucristo imát wac bahjacro. Chauninat ra yehw̃ teti

chácataro. ¹¹ Cuat ra yehw̃ técayatra istir ítuwi. Istir it cun bártara ima ra yehw̃ téjequey sicor ténawi. Serat cat wiya yehw̃ teti jácataro.

¹² Cahujín quino cat aját uch wacaro. Cara Jesucristo imati uchta wati cuar ajmár chihtá cuitar uchta wacaro. Jesús chiwat wiyin Jesús chiwa bár tacat yehw̃ teti ítataro. Wiya eyta éyinan imár ra yehw̃ te cun bár rehçayat acsar cuiiti ítataro. ¹³ Wiw̃ inat cat ra Jesús chiwa bár tacat yehw̃ teti ítataro. Ra eyta éyinan imár wiyin yehw̃ te cun bár rehçayat acsar cuiiti ítataro. ¹⁴ Sirat ítitan, Jesús chiwa wiw̃ inat Jesús chiwa bár bin jor cháçayat wiya chihtá cuitar ra ey Sir uwan wan waátaro. Wiya Jesús chiwa bár bi cat, ra chihtá cuitar Sir uwan wan waátaro. Eytair báreyra eyin sasá Siray bár bin éytaro. Cuatán sas ey cat Sir sasaro. ¹⁵ Eyta cuatán Jesús chiwa bár binat séoan yehw̃ ten wacayat, yehw̃ te áytira sítu jaw̃ i. Séoan yehw̃ ten wacayat, eyta yajçayta acu çaw̃ jaw̃ i. Yehw̃ teti acu seo síwaytai batro. Sirat isra técuati itin waquír cháçacro. ¹⁶ Wiw̃ ú, bah ráatan ítçhareht yájçajareht ba chihtá cuitar Jesús tamo seh̃way yehnátatara, seh̃way yéhnajartara bahat istítiro. Seru, ba wiyat ítçhareht yájçajareht Jesús tamo seh̃way yehnátatara, seh̃way yéhnajartara bahat istítiro. Istiti etar séoan yehw̃ ten wacayat, çaw̃ jaw̃ i.

¹⁷ Ba bitara bin cuat Sirat cáçactara, ba bitara rehquín Sirat cáçactara ey tamo sihw̃a sáçati ítuwi. Wiya ji bántara, wiya bár bántara, im eyta ítuwi. Umá cuijác bántara, umá cuiti bántara, cárintara, cacmíntara, im eyta ítuwi. Sirat ba bitara itin ac cáçactara, eyta jaw̃ ítuwi. Aját chihtá ey Sir uw sécuquin bahnaquin quin eyta wacaro. ¹⁸ Umá cuijáquinan Siray cáçayatan, éyinan cuiti bin éytara chati jaw̃ i. Cuat umá cuiti éyinan Siray cáçayatan, éyinan umara cuic ayti jaw̃ i. ¹⁹ Umá cuiquít cat, Sir ub çahmar bitarach batro. Umá cuiti jaquit cat, Sir ub çahmar bitarach batro. Cuat Sir chihtá caquir cuitar Sir ubot ay waátaro. ²⁰ Sirat ba bitara bin cáçactara ba im eyta tehmoti jaw̃ i. ²¹ Anto cati cuat baan cahujín acu cacmín rehquíçtara sihw̃a sáçati ey cat im eyta çaw̃ i. Cuat ba patronat ba quin “Baat as acu canar yajquíc et cúntara ohbac etír biwi,” wacayat, eyta yajw̃ i. ²² Réçaram Sirat baan imáy anto cati cuat baan uw acu cacmín rehjëçtara, ahra Sirat ítitan, acsara cahujín acu cacmí batro. Sirat ítitan, cahujín chihtá cuitar ítiti cuar Jesucristo chihtá cuitar itro. Eyta cat Sirat baan imáy anto cati cuat cahujín acu cacmín chati rehjëçtara ahra Sirat ítitan, Jesucristo cacminró. ²³ Jesucrístoat baan imáy jaquin ac baat ur ay bár tayar yajác tun cháçacro. Eyta bira baan cahujín chihtá cuitar ítiti jaw̃ i. ²⁴ Rábinu, ba bitara itin acu Sirat cáçactara, ah cat im eyta ítuwi. Sir tamo sihw̃a rabar eyta ítuwi.

²⁵ Ahra wiya yehw̃ti bin ojcor ra chati bin ojcor wacaro. Cara Jesucrístoat ey ojcor icúr wac bahti cuar ajmár ur icar bitara seh̃w̃actara ehçuro. Jesucrístoat as racar reht as quin urá wijac etar aját tew̃ ic ey ohbac rahçuátaro. ²⁶⁻²⁷ Ahran is cuácata wajác cuitar bar cab cu racaro. Eyta cuácayat, bíyinan wiya jítara, wiya ji ítuwi. Yehw̃ jáquinay im eyta yehw̃

teti ituwi. Cuat bíyinan wiya bártara, bíyinan ra bártara acsara im eyta istir ituwi. ²⁸Aját eyta waquíc cuar baat wiya yehw̄ íctara, bitarach batro. Wiw̄ inat cat ra chácayat bitarach batro. Cuat bíyinan wiya yehw̄ íctara, cuít cuácataro. Eyta cuácatay ba cuati ac aját eyta yehw̄ ayti siu cunro.

²⁹Rábinu, aját bah quin uch wacaro. Uwa cuaquíc cuitar caba cuwayta birách batro. Eyta cuácatay ah yahncút wiya ji binan, wiya bár bin itir eyta ituwi. ³⁰Ba bíyinan yarjaquin racar cue rehcação, ahra cue bár bin itir eyta ituwi. Ba bíyinan ahnítara, ahní bár bin itir eyta ituwi. Bíyinanatan oyan icuran wáhcatay oya bár bin itir eyta ituwi. ³¹Bíyinanatan raya cuitar, oya cuitar, icuran biyan yájtara, rayan oyan rácara cuitra rehti jaw̄ i. Ray eyra, oy eyra, yájcajareht sicor bár jácayqueyra. Eyta bira ey rácatra cuitra rehti jaw̄ i.

³²Baat icúr bi ojcor sihw̄a sácata ítyatan asan ahniro. Eyta cuácatay uch wacaro. Wiya bár éyinatra Sir im istir tamo ohbac síhw̄aro. Sir iman ahní jácayta acu eyta síhw̄aro. ³³Cuat wiya ji éyinatra icúr bi ojcor cuít sihw̄a sácaro. Wiya ahní chácayta acu eyta síhw̄aro. ³⁴Sir tamo cat, wiya tamo cat, sasá tamo cat síhw̄aro. Chihotá istiy cat, istiy cat síhw̄aro. Wiw̄ ín cat im éytaro. Ra bár éyinatra Sir im istir tamo síhw̄aro. Sir im istir úbotan sibirá cat, ajca cat, urá cat ay jaquin síhw̄aro. Cuat ra ji éyinatra ira tamo cat, aw̄at tamo cat, sasá tamo cat, ra tamo cat síhw̄aro. Chihotá istiy cat, istiy cat síhw̄aro. Ra ahní jaquin acu eyta síhw̄aro. ³⁵Baat bacha yajcayta acui ba istir itin wátiro. Cuat ba ohbac rehcatay acu eyta wacaro. Behmarat ay yajcayta acu eyta wacaro. Urá istanác cuitar Sir tamo síhw̄ayta acu eyta wacaro.

³⁶Eyta cuar cahujinat sihw̄at, imár wacján ra bár cuaquir bar chauwíc rehc bic síhw̄ata óraro. Eyta sihw̄ar éyinat ítitan, imár wacjá ra chácata binro, síhw̄actara, eyta chaca áyataro. Behmár urá cut ítitan, éytaan ayan cuitar eyta yehw̄ i. Sir ub cahmar bitarach batro. ³⁷Cuatán ser istiyatan ima wacjá uw quin yehw̄ ayti ac sihw̄ac óraro. Ima ur icar eyta yehw̄ ayti siwin sihw̄ac óraro. Cahujinat ey quin “witi jaw̄ i,” wati cuat ima chihotá cuitar witi acu sihw̄ac óraro. Eyta séhw̄ayat ima wacjá witi cuácatay yársaro. ³⁸Sirat ítitan, sera bíyatan im wacjá uw quin yehw̄ áyatan Sir ub cahmar bitarach batro. Cuat bíyatan im wacjá uw quin yehw̄ ayti súyatan ayan cuít yajcaro.

³⁹Wiw̄ istiyatan ra chácayatan ey jor ítataro. Ima ra chaquir yaric oceso tas eyta ítataro. Cuat ra yáryatra istiy jor yehw̄ íntara, yehw̄ i. Cuatán Jesús chiwa cájaquin jor yehw̄ átaro. Jesús chiwa bár bin jor yéhw̄ajar binro. ⁴⁰Cuat aját séhw̄atan, sácajaquin wiyan ra baran yarsa ítataro. Sácajaquin wiya bucoy ra chati ítyatan, yarsa ítataro. Aját séhw̄atan éytaro. Aját chihotá eyta sehwan acu Sir Ajcan Cámuran Eyat as quin urá wíjacro.

Los alimentos consagrados a los ídolos

8 ¹Bucoy chihotá istiy waquinro. Sirir órojoquey tamo sihw̄an ac ruwa wijac ojcor waquinro. Baatán síhw̄atan, behmaran cuít sinjac síhw̄aro. Cuat bíyinat cuít sínayatan, imaran bahnaquin cuitar síhw̄ata óraro. Cuít sínjaquinat

eyta sihwāy yinata óraro. Eyta cuar býinatan cahujín sehnác rehçayat, éytara sihwā báreyra. Cahujín sehnác rehçayat, cahujín quin Sir chihtá cutar acsar it ayro. ²Cahujinat sihwāt, imatan chihtán cuít sinjac síhwāro. Eyta cuar býinatan imár tamo eyta síhwāyatan, anto caba síntiro. Síntata bi eyan anto síntiro. ³Cuat býinatan Sir sehnáçtara, éyinan Sir imáy çácataro.

⁴Sirir órojoquey ojcor conín acu ruwa wíjaquey tamo uch síhwāwi. Baat itit cat, aját itit cat, sirir órojoqueyra estají batro. Aje batro. Isat ítitan, Sir istanacro. Istiyrá batro. ⁵Cuat uwat waquitan, sirin quir binro, wacaro. Uw tan síhwātan, uch cuitar cat, cuacrár cuitara cat sirin quir bin síhwāro. Istiti etar eyta síhwāro. Uwat eyin tamo cayibin quir bin tamo cat síhwāro. Istiti etar eyta síhwāro. Eyta sihwā cuar ⁶isat ítitan, Siran istanacro. Sitra is acura tetró. Caje uch cutar cat cuacrár cat eyat bahnác waquíç hájacro. Ey tamo sihwān acu is yinjacro. Uwat cayíbinan to sihwā cuar, isat ítitan, cayibra ubistanacro. Cara ubistanacro. Jesucrísticoan eyro. Cara Jesucristo ey aje cut bahnác waquíç hájacro. Ey aje cut is cat yinjacro.

⁷Eyta cuar, cahujinat anto Jesús chiwa yinti cuácayat sirir istiy tamo, istiy tamo síhwājacro. Eyta sihwāc etar, réçaram sirir acu ruwa wijac ey sicar cohjocro. Sirir tamo sihwān acu eyta cohjocro. Eyta cuácayat, Jesús chihtá caqui yahncutra éyinatán ey ruwa ohbac cóhjetro. Ey ruwa cóhçtara, coh rabar “sirir bin quin wijac sicar cohquíc,” síhwāro. Eyin tan eyta síhwāro. Eyta sihwār cohçáyatra “Sir ub cahmar tayar jajquíc,” síhwāro. “Cohjor bi cohquíc,” síhwāro. Eyin tanra eyta síhwāro. Cuat eyta sihwār cohquíc etar urán cuean cuít rehçaro. Sirir bowān eyin ur icar raujac sihwā rabar cuean cuít rehçaro. ⁸Eyta cuar aját waquitan úçtaro. Bitara bin ruwa cóhçtara Sir ub cahmor bitarach batro. Sirir wijac ey sicar cohti bachuyat, isra ur ay batra yájtiro. Wijac ey sicar cohç cuitari uw ur ayra waájatro.

⁹Eyta cuácayat baat ruwa sirir bin quin wijac cohn cuácayat yají çawí. Tan sihwār cohwi. Eytair báreyra, çbaat ruwa bachuti cohquíc oquís urá bow conu eyin urá cuecwa áyajaqui? ¹⁰Ba urán cuít binat sirir bin usar ruwa cóhyeyra, çistiyát baat cohquíc ístajaqui? Eyta ístír çeyat cat im eyta cóhjoqui? Çur icar cohjor bi cohquíc sehwa rabar cóhjoqui? Çruwa sirir acu bin sehwa rabar cóhjoqui? ¹¹Eyta cóhyeyra çba urán cuít cuar baat eyta cohquíc oquís cahujín urá cuecwaajaqui? Behmár urán cuít sihwā cuar çbehmár oquís rabin urá



(1 Corintios 8.7)

cuecwa áyajaqui? Jesucristoan urá conu éyinan racar rehquít chinjacro. Eyta cuar baat eyin ajcá bár rehquít urá cuecu ayro. ¹²Baatán rabin urá bow̄ etach bár bin cuecu ayat Jesucristo ub cahmar eyta yájcajar bin yajcaro. ¹³Ruwa coh̄r cuitar rabin quin Sir tayar yajc áyata óraro. Eyta bira ruwa coh̄r cuitar istiy quin Sir tayar yajc áyatatara, aját eyta bi ruw úchicri cohti jácataro. Rabin quin ur ay bár yajc ayti acu cohti jácataro.

Los derechos de un apóstol

9 ¹Asra cahujín chihtá cuitar ítitiro. Asra Jesús chihtá ehcúquibro. Ajatán Cara Jesucristo ajmár ub cuitar itchacra. Aját ba quin Jesucristo chihtá ehcujac̄ etar baan ey chiwa yinjacro. Baan eyta yinjác etar uwat as ojcor “Jesús chihtá ehcúquibi bár” waquíc tacat cuayir tew̄ro. ²Cahujinat tan síhw̄atra, asan Jesucristo chihtá ehcúquibi bár síhw̄aro. Eyta cuar baat ítitan, asan eyro. As chihtá cuitar baan Jesucristo chiwa yinjác étarwan Jesucristo ima chihtá as quino ehcú áyjacro. Etarwan asan Jesucristo chihtá ehcúquibro.

³As ríoquin quin aját uch wacaro. ⁴Bernabeat cat, aját cat Jesucristo chihtá ehcuquin rehquít, ira cat oya cat buw̄ata binro. ¿Baatrá ey istiti waátaqui? ⁵Chihtá ehcuquin cahujinat cat imár wiya cuiiti bécaro. Eyin wiya Jesús chiwa etar cuiiti bécaro. Jesús ima rábinat cat eyta bécaro. Pédroat cat wiya cuiiti bécaro. Becayat baat eyin quin ira cat oya cat wícaro. Etarwan Bernabétara ástara wiya ji rehquír waquít, wiya cuiiti beyata binro. Wiya acu cat íjmár acu cat ira cat oya cat baat is quino cat wícajar bini batro. ⁶Baat tan síhw̄atra, ¿aját cat, Bernabeat cat ira cat oya cat ubach cat wahn acu rayan íjmár ocsar canar yajcata bin síhw̄aqui? ¿Ba tanra eyta síhw̄aqui? ¿Eyat cat, aját cat ba quin chíajjar bin síhw̄aqui? ¿Sir chihtá ehcwót beyin acu íjmár ocsar canar yajquíc ey étajar bin síhw̄aqui?

⁷Isat chiata bíntara chíajjar bíntara istayta acu icúr bi canar ruoquin tamo síhw̄awi. Soldádoat cat canar yajquíc etar ima ira cat oya cat túntiro. Ira riquib cat éytaro. Ira rica rabar awan semar sicor ira rijác eyan ub chácayat tunti cuar yayata séhw̄aro. Obas obir yajquib cat éytaro. Obas obir yájquibat obas sutá cuhmór racar yahcero. Is Sir chihtá ehcuquin cat éytan wanro. Ira cat oya cat ubach cat baat is quin wícata binro. ⁸Ajmár urá sehwar cuitarai wátiro. Sirat carit cuitar cat im ey ojcor uchta wacaro. ⁹Moisesat Sir chihtá carit cuitar uchta cuihsú bahjacro: “Vacat ritút cucú suquín ac ritút sauro. Eyta sauyat, vaca quin ritút cucú cahují yay áytira yati jaw̄i,” wajacra. Sirat vaca istir tamoi sehwar eyta wátiro. ¹⁰Cuat is tamo cat sehwar eyta wajacra. Ira riquib quino cat ira racar wiquin waquír chájacro. Ritút ehsuquib quino cat ritút ehsúc tehmar ritút wiquin waquír chájacro. ¹¹Eyta cat isat ba quin Sir ima chihtá ay bi ehcujacra. Eyta ehcú tehmar baatán is quin oya cat, ira cat wícata binro. Ba tan síhw̄at, ¿is quino eyta wícajar bin síhw̄aqui? ¹²Cahujinat ba quino icuran biyan síhw̄ati chícaro. Eyta cuar ba tan síhw̄at, ¿Isatwan ba quínora éytara chíajjar bin síhw̄aqui? ¿Ba tanra

eyta síhwāqui? Baat eyta síhwāc cuar eyta cat batro. Isatwan ba quino bar chiata binro. Eyta cuar ísatra uw quino chiay bétiro. Yayat is sacat tacat chiay bétiro. Isat eyta chiay béyeyra, uwat is tamo síhwātan, ísatra ira racar rehquít ehcúc síhwāta óraro. Eyta sehwar éyinat isat ehcuquey rahcti jácata óraro. Jesusat uw siwin chinjác chihtá rahcti jácata óraro. Eyta cuácayat isat chiata bin cuar chítiro.

¹³Sir usi ruóquinat Sir usar bin ira cat yácaro. Sir tamo sehwan ácuán ruwa cat wahnro. Sir ruw wáhnquinatan cahují eyra imát cohcaro. ¿Baat ey istiti waátaqui? ¹⁴Eyta cat Cara Jesucrístoat uch wac bahjacro. Sir chihtá ehcúc tehmár ráhcuiquinatan ira cat, oya cat, ubach cat wícataro. Ehcúc tehmár wícataro. ¹⁵Eyta cuar ajatrá récaji icrí chítiro. Carit uch cuitar ba quin icúr chiyín acui cuihsútiro. Yayat as chinátair waquít, ba quin chia báreyra. Aját ba quin chiquir waquít, ajmarát yajacan, ayan táhnaqui bár síhwataro. ¹⁶Ajmarát uw quin Sir chihtá ehcwá rabar yajacan ayan táhnaqui séhwájatro. Sir imat eyta ehcwayta acu as caquir yehn áyjacro. Etarwan aját ehcútiyera as cue rehcataro. ¹⁷Aját ajmár ajc cut Sir chihtá ehcuquir waquít, baat as quin tayar túnata binro. Cuatán ajmár ajc cutari ehcútiro. Sirat aját ehcú ayjac etar ehcuro. ¹⁸Isat ba quin ehcúc tehmár icúr bi chiti etar, baat is quin táyota óraro: “¿Ícúr racar reht Sir chihtá ehcuqui?” táyota óraro. Eyta táyoyat aját uch wacaro. Aját Sir chihtá ehcwá rabar aját tayar chiti ehcuro. Aját eyta chiata bin cuar chiti racar ehcuro. Aját ba quin racar ehcúc reht asan ahnian cuitro.

¹⁹Asa uw cacmí batro. Eyta cuar asan uwan bahnaquin ácuán cacmír rehcaro. Uw bahnáquinat Jesús chihtá rahcuayta acu asan eyta rehcaro. ²⁰Asa judfoin owár jácayat, judfoin itir eyta as cat eyta itro. Judfoinat Jesús chihtá rahcuayta acu eyta itro. Bach yajquin owár jácayat cat bach yajquin itir eyta as cat eyta itro. Aját bach yajcata bini bár cuar bach yájaquinan wan itro. Bach yájquinat Jesús chihtá rahcuayta acu eyta itro. ²¹Bachan chihtán sinti bin owár jácayat, eyin itir eyta as cat eyta itro. Bachan chihtá sinti binat Jesús chihtá rahcuayta acu eyta itro. Eyta itic cuar aját Sir chíltara ruhw útiro. Aját Jesucristo chihtá wácati yajcaro. ²²Urá bow̄ conu bin owár jácayat, urá bow̄ conu bin itir eyta as cat eyta itro. Urá bow̄ conu binat Jesús chihtá rahcuayta acu eyta itro. Uw istiy owár jácayat, uw istiy owár jácayat, uw istiy owár jácayat, uw eyin itir eyta as cat eyta itro. Uw istiy, uw istiy, uw istiy, bahnáquinatan Jesús chihtá rahcuayta acu eyta itro. Uw bahnaquin Jesucrístoat síwayta acu aját icúr bi bahnác yajcaro. ²³Ajmár cuitatrun bahnác yajcaro. Sir chihtá ehcúc cun rehquít eyta yajcaro. Jesucrístoat as acu cat cahujín acu cat ay yajcata sehwar eyta yajcaro.

²⁴Uwat bitara yajcata bin chihtá sinin acu cuéhsuquin tamo síhwāwi. Cuéhsuquin ricá quir binat cahujín burbar yajquin acu quinro. Cuat cuis istanác biyat burbar yajcaro. Burbar yajcayat cuis otar churot wícaro. Baat cat cuéhsuquinat yajquír eyta yajw̄ i. Sirat im churot ba quin wícyata acu Jesucristo chihtá wácati jaw̄ i. ²⁵Cuéhsuquinat chihjirán cuít rehquín acu récaji sinro. Churotán cuísotar chácayta acu récaji eyta sinro. Churot eya sicor bár jácata biro. Cuat Sirat is wícata eyra sicor batra chaca báreyra. ²⁶Eyta bira

ajatán cuáyatra yájtiro. Sirat as churot wícayta acu aját icuran biyan bahnác yajcaro. ²⁷Cahujinat Jesús chihtá rahcuayta acu icuran biyan bahnác yajcaro. Aját ajmár cuitatrun ur ay bár yajti acu tan úcaro. Aját Sir chihtá ehcúc cuar ur ay bár yájcyeyra, ¿Sirat as técuajaqui? ¿As churot síwajaqui?

Consejos contra la idolatría

10 ¹Uch chihtá baat istayta acu aját ehcuro. Is cohtín bahnaquin Moisés owár bowarám tebir chajac ey tey tawā cahmar béjebro. Sir jor béjebro. Bahnáquinan Sir ajc cut yacúr rahray ohbac waajacro. ²Bowarám tebir chajac ey tey tawā cahmar beyar car yacúr rahray waar car, Moisés chiwa yinjacro. ³Bahnáquinan cajc buru catu cuitar beya rabar maná abir yayot béjebro. Sir imát maná wíjaquey ab yayot béjebro, bahnáquinan. ⁴Bahnáquinat aca sicar rih bos waajaquey yahjacro. Sir imát újaquey yahjacro. Aca eyan Sir imát eyin ac chájaquin sicar bin yahjacro. Aca ey ojcor wacayat, aca ey ójcorai wátiro. Jesucristo ojcor cat wacaro. Jesucrístootan eyin cuitar yajquín ácuán eyin owár béjebro. ⁵Eyinan Moisés chiwa yinjác cuaquir, Sirat wiquey yahjác cuaquir, Siran cahujín eyin acura ahní batro. Siran cahujín eyin acura túrjacro. Eyinat Sir chihtá cati etar túrjacro. Etar eyin cajc buru catu cuitar tív jacro.

⁶Isat cat éyinat yajquír eyta yajti acu Sirat eyin tív jacro. Isatra is cohtinát ay bár yajác eyta yajti acu eyin tív jacro. ⁷Cahujín éyinatra sirir órojoquey ojcor conjacro. Siri bár ey tamo síhwajacro. Etarwan Sir carit cuitar wacaro: “Uw eya bacú yahay raújacro. Ira cohy raújacro. Cohr car sirir órojoquey cac cahmar ay quináy yinjacro.” Baat éyinat ay bár yajquír éytara yajti jawí. Sirir órojoquey tamora síhwati jawí. ⁸Cahujinat isár yajacro. Eyta yajcayat ques ricá to bin sácajacro. Veintitres mil bin riy istanác icar sácajacro. Isat éyinat yajquír éytara yajti jácataro. ⁹Cahujín éyinatra urá ay bár yajcayat Sir tec chíjacro. Eyta tec chíjac ques cumoroát eyin tív jacro. Isatra éyinat Sir tec chíir eyta Sir tec chiti jácataro. ¹⁰Cahujinra Sir tamar conjacro. Eyta conyat ques cuacúr cacmát eyin tív jacro. Eyin Sir tamar conjác eyta isra eyta conti jácataro.

¹¹Eyinat yajti acu eyta cuécujacro. Cahujínatra im eyta tewti acu cuécujacro. Isat ay sínayta acu eyta yajquey chihtá cuihsú bahjacro. Is ah uch cuitar itquin quin ehcún acu cuihsú bahjacro. Ahrun Sirat is siwic cab kujác reht is quin ehcún acu cuihsú bahjacro. ¹²Bíyinatán “asan urán cuít etar bitách cuácajatro,” síhwayatan, éyinan yají chácataro. Eytair báreyra, yají chátieyra, ¿imár ur ay bár yajcayta acu cayar yájcajaqui? ¹³Sisramat ba quin ur ay bár yajc aya rácatro. Eyat cahujín quin yajc ayir eyta ba quino cat im eyta yajc aya rácatro. Eyta cuar Sirat ba cuitar wacátaro. Sir ima urá istanác reht ba cuitar wacátaro. Sisramat ba quin ur ay bár yajc ayay yehnyat, baat tan úcajar acat bini yajc áytiro. Sisramat ur ay bár yajc ayay yehnyat baat Sir tamo síhwáyatra, eyat ba cuitar yajcátaro. Ur ay bár yajti acu tan úcayta acu ba cuitar yajcátaro.

¹⁴Rábinu, eyta bira, Sirir órojoquey tamoron cónui síhwati jawí. ¹⁵Baan urá ji etar ba quin wacaro. Aját uní wáctara, uní wátitara, baat ey síhwáwi.

16 Isat Jesucristo chinjác chihťá tamo sihw̄an acu chistár ub bacú yahcaro. Yah rabar wacaro: “Jesucristoan is cuitar Sir tayar tunin acu chinjacro,” wacaro. Ey ab bijác tamo síhw̄aro. Ey yah rabar is cat Jesucristo chinír éytaan wan rehcaro. Isat pan cat cohcaro. Pan coh rabar Jesucristo is cuitar Sir tayar tunin acu chinjác tamo síhw̄aro. Pana quehwír cohcaro. Eyta quehwá raba Jesucristo sibár yaujác ey chihťá tamo síhw̄aro. Pan ey coh rabar, isan Jesucristo yawwir éytaan wan rehcaro. 17 Pan istanáć cuaquir, isat ricán to binat owár cohcaro. Pan istanáć coh raba síhw̄atan, is bahnaquin cat urá istanacro.

18 Israélinat yajquíc tamo síhw̄awi. Eyinat Sir usar ruwa yawwir coh rabar Sir tamo síhw̄aro. Sir ruwan owár coh rabar imaran tamo síhw̄atan, Sir chíwaro. 19 Aját wac uch yají ehcunro. Eyta waquíc cuar sirir órojoc eyan urá chira, estajira, síhw̄ati jaw̄i. Ruwa sirir ac wijac etar ruwa tehmojóć síhw̄ati jaw̄i. 20 Sir tamo síhw̄ati binat sirir tamo sihw̄an acu ruwa yauro. Cuat éyinatra Sir queney tamora síhw̄atiro. Istiti etar sirir ey tamo síhw̄ar yaúqueyan sicor rusamin acu, Sisramin acu yauro. Etarwan baara rusamin, Sisramin chíwai yin ay cun batro. 21 Jesucristo tamo sihw̄an acu chistár ub rihar yáhyeyra, acsar rusamin tamo cat, Sisramin tamo cat sihw̄an acu bitách yáhjatro. Jesucristo tamo sihw̄an acu pan cóhyeyra, acsar rusamin tamo cat, Sisramin tamo cat sihw̄an acu bitách cóhjtro. Urá bucáy sihw̄a rabar bitách yáyajatro. 22 Isat urá bucáy sihw̄a rabar yáhyeyra, ¿Sirat is sar es yájcajaqui? ¿Ijmár sar es yajquír técuajaqui? Isatra eyra cayar yájcajatro. Eyra burbar yájcajatro.

La libertad y el amor cristiano

23 Cahujinat waquíc: “icúr bi bachuti yajcátaro,” wacaro. Cuatán icúr bi bahnác ohbac yájcajatro. “Icúr bi bachuti yajcata,” waquíc cuar, cab istiy cut icúr yajcayat, cahujín ruhw̄uro. 24 Eyta bira behmár istir acu étana ay yajti cuaquir, cahujín acu cat ay yajw̄i.

25 Bi ruwan cohtá bíntara uch síhw̄awi. Rasá cuitar ruwa ráqueyrun síhw̄ati cohwi. Sirir tamo sihw̄an acu yaujáćtara, ey tamo sihw̄an acu yaujác ey bártara, urá sihw̄a sácati cohwi. 26 Sir carit cuitar wacaro: “Cajcan teyan Sir imayro. Cajc uch cuitar icuran biyan bahnacan Sir imayro,” wacaro. Eyta bira ruw eya Sir imáy chajac sihw̄ar cohwi.

27 Sir chiwa bár binat imár owár ruwa cohn ac ba chiata óraro. Eyin owár baat cat coh cun rehcata óraro. Eyta chícayat, coh cun rehcat, ohbac cohy biwi. Eyinat icúr cohn wícayatan, bachuti cohwi. Behmár urá sihw̄a sácati cohwi. 28 Cuat istiyát “Uch ruwa sirir tamo sihw̄an acura yaujacro,” wacáyatra ruw eyra cohti jaw̄i. Eyta wajaquin eyin sehná rehquít cohti jaw̄i. Ey urá cuécuti acu baat cohti jaw̄i. 29 Aját istiyát urá sihw̄ac ojcor wacaro. Baat urá sihw̄ac ójcori wátiro. Ey urá cuécuti acu cohti jaw̄i. Ba cahujinat wacaro: “Istiyát cohti bachuyat, éyatra as quin coh áytira síwajatro,” wacaro. 30 “Aját Sir quin ‘oquéy,’ waquír car cohcaro. Eyta bira ¿bitara reht as quin coh ayti síuqui?” wacaro. 31 Behmár owár eyta tew̄íc etar aját uch wacaro. Baat ira yáquictara, bacú yáhćtara, bitara útura

yajquíctara, uwat Sir tamo ay síhwāyta acu yajw̄i. ³²Ba oquís judíoín quino cat, griégoin quino cat, Sir sasá quino cat, ay batra yajc ayti jaw̄i. ³³Aját bitara útura yajcáyatan, bahnaquin ahní rehcaýta acu yajcaro. Ajmár istir acu étani yájtiro. Cuat cahujín acu ay yajcaro. Aját eyin ac yajcáyatan, Sir chih́tá cácata óraro. Cácaýat, Sirat eyin bar síwayqueyra. Eyta síhwā rabar aját bitara útura yajcaro.

11 ¹Jesucrístoat yajquír eyta aját cat eyta yajcaro. Aját eyta yajcayát, aját yajquír eyta baat cat im eyta yajw̄i.

Las mujeres en el culto

²Aját ba quin wacaro: “Baatán yarsa yajcaro,” wacaro. Ajatán récaji icúr yajquín wac bahjáctara, baatán eyta yajcaro. Aját ehcujác chih́tá tan chinti yajcaro. Eyta cuácayát, aját ba ójcoran ay wacaro. ³Baat eyta ay yajquíc cuar acsar uch cat sinwi. Aját ba quin uch wacaro. Serin bahnaquin acu Jesucrístoan cárraro. Chaunín bahnaquin ácuán imár ráinan cárinro. Eyta cat Jesucristo acu Siran ima cárraro. ⁴Eyta cuácayát, sérinatra uw owár Sir ojcor conyat, Sir chih́tá ehcwayát, cuisa cuítar icúr chati cuar conátaro. Cuisa cay cuti cuaquir ehcwátaro. Cuisa cay cúcyeyra, uwat síhwátaro: “Uyat Sir ajcá bár bécaro,” síhwátaro. ⁵Cuatán chaunínatra cuisa cay cuquír conátaro. Cay cuquitrun Sir chih́tá ehcwátaro. Eyta cay cútieyra uwat wacátaro: “chaunín éyinatra imár ra ajcá bár bécaro,” wacátaro. Chaunín éyinatra im cuis anar bahnác ehs bo ter eyta yajcaro. ⁶Chaunín bahnaquin imár cuisa cay cuquír car conátaro. Cuat cay cu cun bártara, cuisa anár bahnác ehswátaro. Cuat cuis anár bahnác ehsú técaýatan, uwat ey tamo ay bár síhwāyqueyra. Eyta bira chaunín cuisa cay cuquír car conata binro.

⁷Sirat sérinra iman wan chájacro. Eyta cuácayát uwat serin istír car, Sir tamo caran cuít síhwāyqueyra. Eyta bira sérinan ima cuis eyra cay cuquín acui batro. Cuat uwat chaunín istír car, ey ra tamoan ay síhwāyqueyra. ⁸Récaji chaunín tan sar bin sérara yéhtiro. Cuat sera sicar bebjir uquir chaunín órojocro. ⁹Sirat sérinan wiw̄ín acu chájtiro. Cuat wiw̄ínan serin acu chájacro. ¹⁰Eyta bira chauninra cuisa cay cuquitrun Sir ojcor conata binro. Cuisa cay cuquitrun Sir chih́tá ehcwata binro. Cuisa cay cuquír conyat, Sir cuacúr cacminát cat “ihyú” wacáyqueyra. Cuisa cay cucayát bahnáquinat ítitan, wiw̄ eyat ima ra ajcá ji bequic síhwátaro.

¹¹Chaunín serin acu chajac tacat, Sirat ítitan, serin eyin chaunín bár catrum ay ítajatro. Rahra catum chaunín eyin serin bár catum ay ítajatro. ¹²Récaji wiw̄á sera bebjir sicar bin uquir órojocro. Cuat yahncutra serin chaunín ohcuá sar bin yinro. Cuatán sera cat chaunín cat Sir im ajc cut chájacro. ¹³Baat cat ey chih́tá bitáratara síhwāwi. Chaunín cuisa cay cuti cónyatra, ay batro. Baat cat eyta síhwāc óraro. ¹⁴Uw bahnáquinat síhwátan, sérinra cuis anár tuw̄ti cuácayát, ay batro. ¹⁵Cuat uwat ítitan, wiw̄ínra cuis anár enaran cuít rehcaýat eyan ayro. Chaunín acu cuisa cay cuquín acu cuis anár wiquir chájacro. ¹⁶Eyta bira chaunín Sir ojcor conín acu cuisa eyra cay

cucátaro. Aját eyta wacaro. Isat wiw̃ ín quin eta jaw̃ Sir ojcor conín wacaro. Eyta cuácayat cahujinat ey chih̃tá ques bachoyat, eyta jaw̃ conti wacayat, isat eyin quin uchta wacátaro. Isat cat, Sir uwa bahnáquinat cat síhw̃atan, wiw̃ inat Sir ojcor conín síhw̃ayat, Sir chih̃tá ehcún síhw̃ayat, cuisa cay cuquí car eyta yajcaro. Cay cútira cónajatro. Cay cútira éhcwajatro.

Abusos en la Cena del Señor

¹⁷Aját chih̃tá uch wacayat ba ojcor ay wácajatro. Baan Sir tamo sihw̃an acu owár secuac cuar, yarsa yájtiro. Cuatán owár secuar car sécuquin cahujín ruhw̃uro. ¹⁸Aját rahcuít, ba Sir tamo sihw̃an owár secuac cuar, behmár sicar bin cahujinra ajquí wahw̃uro. Uwat eyta waquey rahcuír car aját uní séhw̃aro. ¹⁹Ba tan síhw̃atra, bíyinan Sir chiwa quéneytara istín acu ajquí wahw̃ata síhw̃aro. Ba tanra eyta síhw̃aro. ²⁰Eyta cuácayat, aját ítitan, baan owár yayay secuac cuar, baat yáqueyan Jesucristo chinjác tamora síhw̃ani yátiro. ²¹Ba yayín yinyat, istiyát cat, istiyát cat cahujín bequic acor ítiti cuar, imár istir ira yácaro. Eyta yácayat, cahujinra yayat cuácaro. Cuat cahujín simat yinro. ²²Baat eyta yácajar bin yajcaro. ¿Bitara reht rahra rahra tahw̃uti yaqui? ¿Sir uw quehsí reht, tahw̃uti cahujín bequic acor ítiti yaqui? ¿Ray bár bin ruhw̃ ún síhw̃ari baat eyta yaqui? Baat eyta yajcayat ay batro. Aját ba ítitan, ur ay bár yajcaro. Uw owár ira tahw̃ ú cun bártara behmár úsirun eyta yawi.

La Cena del Señor

(Mt. 26.26-29; Mr. 14.22-25; Lc. 22.14-20)

²³Cara Jesucrístoat as quin wac bahjacan aját acsar ba quin ehcuajacro. Wac bahjacan uchan eyro: ima chiwa sicar bin úbistiyat Jesucristo quehsí bin at icar wiquin tinyat, Jesucrístoat pan caquir yehw̃ jacro. ²⁴Yehw̃ ír, Sir quin conjacro. Conár ey cotchacro. Cotír wajacro, “Pana uchan as sibatró. As sibirán ba siwin acuro,” wajacro. Ima tamo sihw̃an acu eyan owár tahw̃ ú yayín wajacro. ²⁵Pan cohr car, toca yehw̃ jacro. Toc icar chistár ub rihatro. Toca yehw̃ ír wajacro: “Sirat ‘bachan chih̃tán cahmor wajaquey acsar tehmón,’ wajacro. ‘Ab cut ba siwin’ wajacro. Eyta wajaquey uní rehquín acu as ab béyqueyra. Eyta bira chistár ub rihar uchan bitat bitat yahcayat, owár tahw̃ ú car as tamo síhw̃awi: ‘Jesusat is siwin ac chinjacro,’ síhw̃awi,” wajacro. ²⁶Eyta cuácayat ba bitat bitat pan uch cohr car, chistár ub rihar uch yahr car, Jesucristo chinjác chih̃tá ehcuro. Eya sicor cajc uch cut wic oco tas cuar eyta yajca rabar Jesucristo chinjác ehcuro.

Cómo se debe tomar la Cena del Señor

²⁷⁻²⁸Eyta bira pan ucha cohn cahmor, bacua ucha yahn cahmor, bahnáquinat imár urá bitátarata ey síhw̃ataro. Eyta sihw̃ar catrun yayátaro. Eytair báreyra, pana uch cuayir cóhyeyra, bacú uch cuayir yáhyeyra, baat Sir

tayar yajcaro. Eta jaw̃ Jesucristo sibár cat ab cat ajcá bár chácyeýra, Sir tayar yajcaro. ²⁹Bíýinat ey sibirá cat ab cat ajcá bár cuar pan cat cohçayat, bacú cat yahçayat, Sirat eyin cuécwayqueýra. Pan síh̃w̃ati cohçayat, bacú síh̃w̃ati yahçayat, Sirat ey ques cuécwayqueýra. ³⁰Eyta yajçayat ba sicar bin cahujinra canar batro. Cahujinra yatro. Cahujinra bar sácajacro. ³¹Isat íjmár ur ay bár yajác ques réçaji cuécuctara, Sirat is cuecwa báreyra. ³²Cuat Síratra íjmarat ur ay bár yajác ístír is cuécuro. Ay bár yajquíc etayta acu cuécuro. Sir chihtá cati bin cab oc icar ayir eyta, uw Sir imáy cájaquin eyta ayti ac réçaji cuécuro.

³³Eyta bira, rábinu, ba Sir tamo síh̃w̃an ac yayín sécuayát, cahujín anto behti cuat ira yati ítuwi. ³⁴Ba cahujín yayí réhctara, anto Sir tamo síh̃w̃an acu sécuati cuácayat behmár úsirun yawi. Eytair báreyra, cahujín behquic acor ítiti cuar yáyeyra, Sirat ba cuécwayqueýra.

Etan chihtá cahujéy ojcor aját awan waquinro. As erar cuçayat waquinro.

Las capacidades que el Espíritu Santo da a cada uno

12 ¹Rábinu, ahra aját acsar chihtá ístiy síw̃ inro. Sir Ajcan Cámuran Eyat uw quin urá wiquic chihtá ojcor síw̃ inro. Baat cat ey chihtá ístayta acu ba síw̃ inro. ²Aját ítit cat, baat ítit cat, ba anto Sir chihtá rahcti cuat, cuayir yajacro. Baat sirir órojoquin tamo síh̃w̃ajaquinro. Sirir órojoquin quir bin tamo síh̃w̃ajaquinro. Cucáj bár bin, ajc bár bin tamo síh̃w̃ajaquinro. Ba quin bi tamo síh̃w̃an wájáctara, baatán ey tamo síh̃w̃ajaquinro. Ey ojcor conjáquinro. ³Eyta bira aját ba quin uch siw̃ cun rehcaro. Bíyatan Jesús ojcor “icúr acui batro,” wacáyatan, Sir Ajcan Cámuran Ey ajc cutari eyta téw̃ tiro. Cuatán rehratán “Jesús im eyan cáraro,” wacáyatan, Sir Ajcan Cámuran Ey ajc cutar eyta wacaro. Sir ima urá uw quin wítieýra, eyta wácajatro.

⁴Cahujín quin urá ajquír bi, cahujín quin urá ajquír bi, cahujín quin urá ajquír bi wiquic cuaquir, ístán binat wícaro. Sir Ajcan Cámuran Eyat wícaro. ⁵Cahujinat ajquír bi, cahujinat ajquír bi icúr bi yajcaro. Eyta cuaquir bahnáquinat Cara istanáç ey acu yajcaro. ⁶Cahujinat canár ístiy, cahujinat canár ístiy yajcaro. Eyta cuaquir Sir istanáç eyat bahnaquin quin yajc ayro. ⁷Cahujín quin urá ajquír bi, cahujín quin urá ajquír bi, Sir Ajcan Cámuran Eyat wícaro, Sir uwat rahra, rahra ur ay yajçayta acu. ⁸Cahujín quin Sir Ajcan Cámuran Eyat ay síh̃w̃ar tew̃ayta acu urá wícaro. Cahujín quin chihtá sinjac ey ojcor tew̃ayta acu urá wícaro. Sir Ajcan Cámuran eyat wícaro. ⁹Cahujín quin Sir Ajcan Cámuran Eyat urá wíçayat, éýinat Sir quin icúr chíctara, Sirat wíçayqueýra. Cahujín quin uw yarquin tan jáçayta acu Sir Ajcan Cámuran im eyat urá wícaro. ¹⁰Cahujín quin icúr bár sicar yajçayta acu urá wícaro. Cahujín quin Sir chihtá ehçwayta acu urá wícaro. Cahujín quin urá wíçayat, éýinat uwat bi chihtá cuitar yájctara ístátaro. Sir ima chihtá cuitar yájctara, rusamin chihtá cuitar yájctara, éýinat ey ístátaro. Cahujín quin cuw ajquír sinti bin tew̃ayta acu urá wícaro. Cahujín quin cuw ajquír tew̃quey icúr ojcor tew̃íctara ehçwayta acu urá wícaro. ¹¹Eyta wiquéy bahnacan

Sir Ajcan Cámuran Eyat wícaro. Istanác eyat wícaro. Cahujín quin, cahujín quin Sir Ajcan Cámuran Eyat urán bi wic cúntara ima chih̄tá cuitar urá wícaro.

Todos pertenecemos a un solo cuerpo

¹² Sir Ajcan Cámuran eyat istiy quin, istiy quin urán ajquír ajquír wícaro. Icur̄ acu eyta wíctara aját ey ojcor ehcunro. Ey chih̄tá istayta acu uw sibirán bitáratara ey ojcor ehcunro. Uw sibár istanác cuaquir átcara cat, quesacara cat, ub cat, cucáj cat, atuc cat, bahnacan chero. Ub cat, cucáj cat, quesacar cat cuaquir, sibatrá istanác biro. Uw sibár eyta, Jesucristo uw owár bin cat im éytaro. Jesucristo chiwan cahujín, cahujín ajquír cuaquir, Jesucristo ajc cut ur istanác chájacro. ¹³ Sir Ajcan Cámuran Eyat istanác binat is quin Jesucristo chih̄tá cac ayro. Isat ey chih̄tá cácat, is rih sar siw̄yat ítitan, isan Jesucristo owár ur istanác chácaro. Judíoín tacat, judíoín bár bin tacat, im istán chácaro. Carin tacat, carin bár bin tacat im istán chácaro. Cahujín, cahujín ajquír cuara, Sir Ajcan Cámuran Eyat is bahnaquin quin ima urá wícaro.

¹⁴ Uwan átcaraír waquít óraqui batro. Cuatán cucáj chi, ub chi, atuc chi, bahnác chey cuácayat sibirán bahnác óracro. ¹⁵ Ba quescarat ajc tew̄ átaír waquít, uch wacata óraro: “Asan quescatro. Asra átcari batro. Eyta chih̄tara asan sibirá ey owár bini batro,” wacata óraro. Eyta tew̄quir waquít, cuayar tew̄ átaro. Quescar eyra sibár ey sícara binro. Ey sibár owár binro. ¹⁶ Ba cucaját ajc tew̄ átaír waquít, uch wacata óraro: “Asan cucajró. Asan ubi batro. Eyta chih̄tara asan sibár ey owár bini batro,” wacata óraro. Eyta tew̄quir waquít cuayar tew̄ átaro. Cucáj eyra sibár ey sicar binro. Ey sibár owár binro. ¹⁷ Sibár bahnacan ub ímaír waquít, cucáj bár rehquír waquít, bi cuitari ráhcujatro. Sibár bahnacan cucáj ímaír waquít, recha bár rehquír waquít, bi cuitari ina yáhjatro. ¹⁸⁻¹⁹ Bahnacan ajquír wahw̄ujaquir waquít, bahnác óraqui chácajatro. Chohcuír rehcatáro. Cuatán Sirat éytara chátiro. Sirat im ajc cutar sibirán atcar chi, cucáj chi, recha chi, atuc chi bahnác istán caba orac chájacro. ²⁰ Etarwan ajquír ajquír bin cuáquiran, sibár istanacro. Sir uw owár bin cat im éytaro. Quir bin cuar im istanác binro. Eyta chih̄tara Sir uw istiyát “asa ba owár bini batro,” wácajar binro.

²¹ Ub cat, atcar cat rahra rahra obir yajcaro. Ba ubat ajc tew̄ átaír waquít, ba atcar quin uchta tew̄ata óraro: “Asan ubro. As ayan bah cuitro. Eyta chih̄tara bah táyotiro. Bah bár cuácayat, bitarach batro,” tew̄ata oraro. Eyta tew̄ átaír waquít cuayar tew̄ áta oraro. Téw̄ajar bin tew̄ átaro. Cuisa cat quesacar cat rahra rahra obir yajcaro. Ba cuisat ajc tew̄ átaír waquít, ba quesacar quin uchta tew̄ata óraro: “Asan cuísaro. As ayan bah cuitro. Eyta chih̄tara bah táyotiro. Bah bár cuácayat, bitarach batro,” tew̄ata oraro. Eyta tew̄ átaír waquít cuayar tew̄ átaro. Téw̄ajar bin tew̄ átaro. Ba sibirá wahw̄úr car rahra rahra ajc tew̄ átaír waquít, eyta cuayar tew̄ata óraro. Sir uw cat éytaan wan cuayar téw̄ajar binro. Cahujín quin “bah táyotiro,” wácajar binro.

²²Eytara téwajjar cuat ba sibár sicar bin cahují chihchír bár eywan cuít táyoro. ²³Isat íjmár sibár sicar bin cahujeyra etach bár síhw̄aro. Eyta síhw̄a cuar, isat ey wihár ojcum oya óriquen bi chácáro. ²⁴Cuatán sibár cahují óriquen eyra cuitra obir yajca báreyra. Etarwan Sirat sibirá ay órojocro. Recha chi, átcara chi, bahnác órojocro. Cuat sibár sicar bi tamo ayan etach bár síhw̄ayat eyan ajcá ji chácayta acu eyta órojocro. Eytaan wan Sir uw sicar býinan conú bintara, eyin ajcá ji chácataro. ²⁵Sibara istanác cuar, ub cat, cucáj cat, quescara cat, bahnác istán sécuaro. Etarwan ub cat, cucáj cat, quescara cat rahra, rahra owara obir yajcátaro. Sirat eyta obir yajquín acu waquíur chájacro. ²⁶Etarwan as sibár sicar bin bi ruhw̄uyat, átcartara, quescáratarara ruhw̄uyat, as sibár bahnác yar wíniro. Etar cat as sibár sicar bi tamo, cuis anarátara tamo, ay séhw̄ayat, ay wacayat, as sibár bahnacan ahniro. Eytaan wan Sir uwa rahra rahra obir yajcata binro. Rahra rahra cahujín racar cue rehcata binro. Rahra rahra cahujín owár ahní rehcata binro.

²⁷Íjmár sibár eyta, isan Jesucristo chiwa owár bin cat éytaro. Ba sibár atcar cat, recha cat, cahují ajquíur, cahují ajquíur cuar istán bin eyta, ba Jesús chiwa cat éytaro. Cahujín ajquíur, cahujín ajquíur cuaquíur, ba bahnáquinan istán rehcaro. ²⁸Sirat Jesucristo uw sicar cahujinat chihotá istiy, cahujinat chihotá istiy yajquín yin áyjacro. Récaraman ima chiwa ayin acu Jesús chihotá ehcuquin yin áyjacro. Bucoy cuitar Sirat ima chihotá ehcuquin yin áyjacro. Bawoy cuitar chihotá siw̄quin yin áyjacro. Etar cuitar uwat icúr bár sicar bin yajquín acu yin áyjacro. Etar cuitar yarquin tan jaquin acu cat, uw cuitar yajquín acu cat yin áyjacro. Uwat bi yajcátatarara ey yajc ayin acu cat yin áyjacro. Etar ruw̄ ár ojcor cuw sinti bi téw̄ín acu cat yin áyjacro. ²⁹Baatán cuáyatra síhw̄ati jaw̄ i. Bahnáquinan Jesús chihotá ehcuquinra yínajatro. Bahnáquinan Sir chihotá ehcuquinra yínajatro. Bahnáquinan uw síw̄quinra yínajatro. Bahnáquinan icúr bi bár sicar bin yájquinra yínajatro. ³⁰Bahnáquinan uw yarquin tan jáquinra yínajatro. Bahnáquinan cuwa sinti bi téw̄quinra yínajatro. Bahnáquinan cuw sinti bi téw̄yat rahcuín ácura yínajatro.

El amor

³¹Eytaan baatán chihotá ay bi yajcáy yina rácatro. Cuatán chihotá istiy ayan cuít bi aját ba quin ehcunro.

13 ¹Aját uw istiy cuw cutar cat, uw istiy cuw cutar cat, uw istiy cuw cutar cat, Sir cuacúr cacmín cuw cutar cat téw̄quir waquíur, uwat as tamo cuít síhw̄ata óraro. Cuatán aját cuw bahnác cutar téw̄íc tacat uwa sehnác bártara, asa icúr acui bár chácataro. Aját téw̄ican yera tec ajc éytaro. ²Aját Sir chihotá bahnác sinin acu as urá chi yehníctara, uwat as tamo cuít síhw̄ata óraro. Cuatán aját eyta sinic tacat, uw sehnác bártara, asa icúr acui batro. Sir chihotá anto istiti bi caquin acu as urá chi yehníctara, uwat as tamo cuít síhw̄ata óraro. Cuatán aját chihotá ey caquic tacat uw sehnác bártara, asa icúr acui batro. Sir chihotá ehcujaquey bahnác sinin ac as urá chi yehníctara, uwat as tamo cuít síhw̄ata óraro. Cuatán aját ehcujaquey bahnác sinic tacat, uw sehnác bártara asa icúr acui batro. As Sir

ajc cut rirar caje istiy ayin acu as urá chi yehníctara, uwat as tamo cuít síhwata óraro. Cuatán aját rirar caje istiy ayic tacat uw sehnác bártara, asa icúr acui batro. ³Cuayin quin as oyan iran bahnác tahw̄uquir waquíu uwat as tamo cuít síhwata óraro. Ajmár sibirá wahnín acu cahujín at icar chaquir waquíu uwat as tamo cuít síhwata óraro. Cuatán eyta yajquíc tacat aját uw sehnác bártara, asa icúr acui batro. Uw tamo séhwati cuar eyta yajcyeyra, cuayar yajcaro.

⁴Bíyatan uw sehnác rehçáyatan, éyatan cahujín acu inra tura báreyra. Cahujín acu ay yajcaro. Uw sehnác eyat cahujinay oya racar isó báreyra. Eyat im ojcor iman ayan cuitra tew̄a báreyra. Uw sehnác eyat icúr bi chi tacat im ojcor “asan cáraro,” sehwa báreyra. ⁵Eyat cahujín ruhw̄ á báreyra. Uw sehnác éyatra icuran biyan im istír acu chaca racar isó báreyra. Uw sehnác éyatra tecuas yajca báreyra. Cahujinat uw sehnác ey ruhw̄ úc tacat eyat sehwa yara báreyra. ⁶Cahujinat ur ay bár yajcayat, eyan ahnira rehca báreyra. Cuat ur ay yajcayat eyin owár ahní rehcaro. ⁷Cahujinat ruhw̄ úc tacat im eyta acsar uw sehnác chácáro. Sehnác eyat etiti uw tamo ay séhwáro. Sehnác eyat sehwat, cahujinat ay yajcata, séhwáro. Eyta yajquíc acor itro. Sehnác eyat uw sehnác tehmótian tan úcaro.

⁸Cahujín quin Sir imát tew̄quey ehçún acu urá wícaro. Eyta cuar chájareht ehçúc chihotá bahnác ehçú waacayat, acsar bitani ehçwá báreyra. Cahujín quin cuw sinti bi tew̄ín acu urá wícaro. Eyta cuar chájareht tew̄íc cuwan sicor tew̄í etáyqueyra. Cahujín quin chihotá cuít sinin acu urá wícaro. Eyta cuar chájareht bahnacan it waacayat acsar bitani sina báreyra. Cuat uw sehnár yájqueyan úchicri rehç tacat sehnara yajc bahná báreyra. ⁹Is uwat chihotá sinic cuaquir bahnacra sina báreyra. Isat Sir chihotá ehçúc cuaquir bahnacra ehçwá báreyra. ¹⁰Cuatán bahnác sinic cab cucayat, chihotá caba bár eyra icúr acui batro. ¹¹Uch cat síhwawi. As anto sah cuácayat, sasát tew̄ír eyta aját cat eyta tew̄jacro. Sasát síhwár eyta aját cat eyta séhwájacro. Sasát bow̄ yajquír eyta aját cat eyta bow̄ yajacro. Cuat bar cunír cuitar, sasát yajquír éytara yájtiro. Sasát yajquíc eyra bar et bahjacro. Eyta cat ah uch cuitar catum bahnác cábarun istítiro. Cuat Jesucristo sicor wicáyatron, bahnác caba istáyqueyra. ¹²Uch cat síhwawi: Uwat espejo ícitra ay óraqui ístajatro. Cuat ub cuitar uchta wahíyatron, ay istátaro. Chihotá cat éytaro. Anto bahnacra istítiro. Cuat Jesucristo is ubot sicor wicayat, isat bahnác istátaro. Sirat ah uch cuitar as istír eyta, aját cat ey chihotá im eyta bahnác caba istátaro, Jesucristo sicor wicayat. ¹³Isat ítitan, uw quin chihotá istiy yajquín urán wíjaquey chájareht icúr acui bár rehçáyqueyra. Eyta cuar isat Sir tamo im eyta acsar síhwataro. Isan Sir owár itic acor ítchacan, im eyta acsar ítataro. Isan uw sehnác cat im eyta acsar sehnác chácataro. Sir tamo síhwac cat ayro. Ey acor itic cat ayro. Cuat uw sehnacan ayan cuitro.

El hablar en lenguas

14 ¹Uw sehnacan cuít chaw̄i. Sirat ba quin urá wícyata acu conwi. Sirat wajác ey ehçún acu urá wícyata acu cuít conwi. ²Cuw sinti bi tew̄ín acu

urá racar etach rehti jawĩi. Uwat cuw sinti bi tew̃ay yehnyat uw quĩnoi tew̃tiro. Cuat sicor Sir ima quino tew̃ro. Eyta tew̃quey úwatra ráhctiro. Eyta tew̃queyra Sir Ajcan Cámuran Ey chihtá cuitar tew̃ro. Uwat rahcti bi tew̃ro. ³Cuatán Sirat wajác ey ehcwáy yehnyat, uw quino ehcuro. Uwat acsar sínayta acu, tan wan chácayta acu, cue rehti acu ehcuro. ⁴Bíyatan cuw sinti bi tew̃yatan, éyatan im istir urá cuít chaquin acu eyta tew̃ro. Cuat bíyatan Sirat wajác ehcwáyatan, Sir uw bahnaquin urá cuít chácayta acura ehcuro. ⁵Ba bahnáquinat cuw sinti bi tew̃ay yiníctara, asan ahniro. Cuat ba bahnáquinat Sirat wajaquey ehcwáy yiníctara, asan ahnian cuitro. Bíyatan Sirat wajác ehcwáyatan, eyan ayan cuitro. Cuat bíyatan cuw sinti bi tew̃yatan, eyan etach batro. Uwat cuw sinti bi tew̃jác chihtá sicor ima tew̃quin cuitar orac rahcuayta acu ehcwátaro. Eyta ehcwáyatra uwat orac rahcuátaro. Rahcuír cat urán cuít chácataro. Eyta chihtara cuw sinti bi tew̃jác chihtá sicor ima tew̃quin cuitar orac rahcuayta acu ehcwayat cat ayro.

⁶Rábinu, uch rahcwi. Aját ba quino cur cat, cuw sinti bi tew̃quir waquíit, ba acura icúr acui batro. Cuatán asa ba quin cur car uchta yajcata binro. Sirat as quin chihtá w̃jjaquey ajmarát tew̃quey cuw cuitar orac rahcuayta acu ehcwata binro. Chihtá cájaquey orac rahcuayta acu ehcwata binro. Sirat wajaquey orac rahcuayta acu ehcwata binro. Sir ima chihtá orac rahcuayta acu síw̃ata binro. Eyta orac rahcuayta acu ehcuti cuácayat asa ba acura icúr acui batro. ⁷Uch síhw̃awi: tirá cat botúrua cat estají bini batro. Estají bin bár cuar ey cuhcayat ajc chiro. Cuat tirátara botúruatara ay cuhti cuácayat, uwat bi cúhctara, ay ráhcuajatro. ⁸Rubar tamo cat síhw̃awi. Uwat rubar ay cúhtítara, uwra secua báreyra. Uwat rubar ajc ay rahcti rehquíit secua báreyra. ⁹Tirá cat rubar cat ay cuhti eyta, uwat cat cuw sinti bi tew̃ic catum im éytaan wanro. Baatrá cuw sinti bi tew̃yat, ¿uwat ba ajc rahcti yájcajaqui? ¿Behmár cuw cuitar cuayar tew̃ajaca? ¹⁰Aját ítitan, caje bahnác cuitar uw cuwan toro. Istiy uwat cat, istiy uwat cat imár cuwa ajuír tew̃ro. Cuw istiy tew̃yat istiyát rahcro. Cuw istiy tew̃yat istiyát rahcro. Cuw istiy tew̃yat istiyát rahcro. ¹¹Eyta cuar aját cuw istiy ráhctítara, ey tew̃quinan as acura caje istiy bin uw éytaro. Rahr cat eyin acura asan caje istiy bin uw éytaro. ¹²Eyta bira uch síhw̃awi. Ba ur icar Sir Ajcan Cámuran Eyat urá wícayta acu cuít conro. Eyta cuácayat biy urá cuitar tew̃yat uwat orac rahcuátataro, ur ey wícayta acu conwi. Eyta wícayat baat Sir uw quin caba ehcwáyqueyra. Eyin urán cuít chácayta acu caba ehcwáyqueyra.

¹³Eyta bira bíyatan cuw sinti bi tew̃yatan, éyatan Sir quin urá chiátaro. Cahujinat orac rahcayta acu ima tew̃quey caba ehcún acu urá chiátaro. ¹⁴Aját cuw sinti bi tew̃a rabar Sir quino wacaro. As ajcat wacaro. As ajcat eyta tew̃ic cuar, ajmár urá cuitar tew̃tiro. ¹⁵Eyta cuácayatan, aját uchta yajquinro. Ajmár ajcat Sir quin tew̃inro. Eyta cat ajmár urá cuitar seh̃war car Sir quin tew̃inro. Uwat rahcuayta acu cat eyta tew̃inro. As ajcat Sir cucajá acat ay tanro. Cuwa sinti bi cuitar ay tanro. Eyta cat ajmarát seh̃war cuitar cat eyta tanro. Uwat rahcuayta acu cat eyta tanro. ¹⁶Aját yajquíit eyta baat cat eyta yajw̃i. Eytair báreyra, ba ajcat cuwa sinti bi cuitar Sir ojcor ay tew̃yat cahujínatra

bitách ráhcuajatro. Baat tew̃quey rahcti cuácayat, cahujinat “ihyú” bitách wácajatro. “Eyta jaw̃i,” bitách wácajatro. ¹⁷Behmarat cuw sinti bi tew̃a rabar Sir quin “oquéy” wacaro. Cuat cahujinra ba tew̃quey rahcuír cutari urán cuít chácajatro. Rahcti reht acsar sínajatro. Bitách cácajatro. ¹⁸Sirat cuwa sinti bi tew̃ín acu as quin urá wíjacro. As quin urá wíjacan, ba quin wijac cuitro. Etar aját Sir quin “Bah ur ayro,” wacaro. ¹⁹As quin urán cuít wijac cuar, uwa siw̃ín acu aját ajmár tew̃quey cuitar tew̃a rácatro. Sir uwa sécuquinat orac rahcuayta acu aját eyta tew̃a rácatro. Orac rahcuayta acu ajc están bi tew̃a rácaran cuitro. Cuat cuwa sinti bi ajcan diez mil bi tew̃a rácaran etach batro.

²⁰Rábinu, aját uch ba quin wacaro. Bihtinát sihw̃ar eyta ba urát cat eyta síhw̃awi. Baat sasát sihw̃ar éytara síhw̃ati jaw̃i. Cuat buwáchcuarat ur ay bár yajti itir eyta ba cat eyta ítuwi. ²¹Sir carit cuitar wacaro.

Sirat wacaro: “Cuwa ajquír tew̃quin cuít as uw quin chih́tá áyinro.

Cajca istiy uw cuít as chih́tá áyinro,” wacaro. “Eyta ayi cuar as chih́tá caca báreyra,” wacaro, Sirat.

²²Etarwan Sir chih́tá cati binat rahcuír áywini rehcayta acu Sir ima uwat cuwa sinti bi tew̃ín waquír chájacro. Cuat Sir im uw áywini rehquín acui batro. Sir uwat Sir tamo acsar síhw̃ayta acura Sirat wajaquey orac rahcuayta acu ima cuw cut ehcún acu urá wícaro. Cuw sinti bi tew̃yat Sir chih́tá rahcti bin acui batro. ²³Eyta cuácayat Sir uw secuar car bahnáquinat cuw sinti bi tew̃ata óraro. Eyta tew̃yat cahujín raúwata óraro. Sir chih́tá cati bin raúwata óraro. Eyta raújaquinat cuw sinti bi tew̃ic rahcuír síhw̃ataro: “Sir uwa túraritro,” síhw̃ataro. ²⁴Cuat bahnáquinat Sirat wajác imár tew̃quey cuw cuitar orac rahcuayta acu ehcúctara, cahujinat ey rahcuátaro. Eyta rahcuír cat, ur ay bár yajác ojcor tew̃yat cuechú rehcatáro. Imarat tayar yajác istír cuechú rehcatáro. ²⁵Eyinat Sir chih́tá ehcuquey orac rahcuír car, imár urá bitáratara istáyqueyra. Eyta istír Sir tamo ay síhw̃ataro. Sir ojcor ay wacátaro. Uw quino cat wacátaro: “Sirat ba uw quino urán cuít wíjacro,” wacátaro.

Háganlo todo decentemente y con orden

²⁶Eyta bira rábinu, as ajc rahcwi. Baat yajcata bin yajw̃i. Ba owár sécuayat, istiyát ay tátaró. Istiyát Sir chih́tá síw̃ataro. Istiyát ur icar chih́tá wijac ey ehcwátaro. Istiyát cuwa sinti bi tew̃átaro. Istiyát cuw sinti bi tew̃yat sicor baat tew̃quey cuitar orac rahcuayta acu ehcwátaro. Owár binat acsar sínayta acu eyta yajw̃i. ²⁷Uwat cuwa sinti bi tew̃ay yinyat, cuisa bucáctara báctara etan binat tew̃átaro. Eyta tew̃ay yinyat, récaram úbistiyat tew̃átaro. Ey yahncút istiyát tew̃átaro. Icar istán cuitar bahnáquinat téw̃ajatro. Eyta tew̃ay yinyat, istiyát chih́tá tew̃quey sicor ba tew̃quey cuitar orac rahcuayta acu ehcwátaro. ²⁸Cuat rehratán sicor chih́tá ey ba tew̃quey cuitar orac rahcuayta acu éhcwajartara, uw owár sécuayat eyin cucáj acat cuw sinti bi téw̃ajatro. Im istír ajquír cuácayat eyta tew̃átaro. Sir owár im istír eyta tew̃átaro. ²⁹Ba owár sécuayat cuisa bucáy bíntara bay bíntara Sirat wajác ey behmarat tew̃quey cuitar ehcwátaro. Eyta ehcwayat cahujinat síhw̃ataro. Uní ehcúctara, uní ehcútita ey síhw̃ataro.

³⁰Ubisti binat Sir chihotá ehcwayat icar, istiy ur icar Sirat chihotá istiy wícata óraro. Eyta wícayat récaji ehcwáy yehnjaquey etátaro. Yahncút ey quin urá wíjaquey chihotá bahnáquinat rahcuayta acu cahmor téwqueyat eyta etátaro.

³¹Ba bahnáquinat ehcú cúntara istiyát récaji ehcwátaro. Etar istiyát yahncút istiyát yahncút ehcwátaro. Uw bahnáquinat sínayta acu tan wan chácayta acu eyta ehcwátaro. ³²Sir chihotá ehcúquinat cuayar tew̄ti acu urá chi cuaquir ehcwátaro. ³³Uw bahnáquinan icar istán cuitar tew̄ín acui batro. Cuat Sirat bítara útara cuayar yajc áytiro. Bahnác yarsa yajc ayro.

Sir uw cajca bahnác cuitar ³⁴uw sécuajac cucajá ácatra wiw̄ín quin tew̄ áytiro. Wiw̄inat sécuajac cucajá acat tew̄ti jácataro. Cuat éyinat imár rain chihotá jaw̄, carin chihotá jaw̄ rahcuátaro. Sir carit récaji chac bahjác cuitar eyta rahcuín acu, yajquín acu cuihsú bahjacro. ³⁵Cuat éyinat chihotá acsar sin cun rehcyat, imár rain quin táyotaro. Imár usi cur car táyotaro. Eytair báreyra, wiw̄inat sécuajac cucajá acat tew̄ay yinyat, ay batro. Sirat ajc wátiro.

³⁶¿Baat bitara reht Sir uw bahnáquinat yajquír eyta yájtica? ¿Ba tan síhw̄atra, behmár quñoan Sir ima chihotá cahmor wijac, síhw̄aca? ¿Behmár istír bin quin Sir chihotá ehcuajac síhw̄aca? ¿Ba tanra eyta síhw̄aqui? ³⁷Ba tac icar bin istiyát Sirat tew̄quey it séhw̄actara, im ur icar Sir urá chi séhw̄actara, eyat aját tew̄quey rahcuátaro. Aját tew̄quey Siray bin etar rahcuátaro. ³⁸Cuat bíyatan “Pábloat tew̄quey Siray bini batro,” wacáyatan, ey chíhtara rahcti jaw̄i. Eyat Sir chihotá cuitar tew̄ic síhw̄ati jaw̄i. ³⁹Rábinu, eyta chíhtara Sirat wajaquey behmár tew̄quey cuw cuitar ehcwá racar reh̄w̄i. Cuwa sinti bi tew̄ín acu ajc waátira yajti jaw̄i. ⁴⁰Cuatán uw owár secuar car bahnác yarsa yajw̄i. Bachoti yajw̄i.

La resurrección de Cristo

15 ¹Rábinu, Sir chihotá aját récaji ehcujaquey aját ba quin bucoy ehcunro. Baatán chihotá aját ehcujaquey bar cájacro. Ey rahcuír wácati yajcaro. ²Aját ehcuquey ay rahcyat Sirat ba síwayqueyra. Baat yarsa rahcuítara, Sir tamo cuayar síhw̄atitara, eyat ba bar síwayqueyra. ³Chihotá uch récaji ba quin yarsa ehcú bahjacro. Chihotá as quin ehcujaqueyan aját ba quin acsar ehcú bahjacro. Récaji chihotá aját bar ehcú bahjacro. Jesucristo is cuitar Sir tayar tunin acu chinjác chihotá ehcú bahjacro. Sir carit cuitar bar chinata chihótán récaji ehcú bahjáquinro. ⁴Chinyat, Jesús chein ruhjacro. Etar bay cuanyat sicor estají yehnjacro. Sir carit cuitar récaji yehnata ehcúr eyta im eyta yehnjacro. ⁵Yehníc cuitar uw quir binat itchacro. Récaji Pedro ubot waacayat itchacro. Etar bucoy ima chiwa once bin ubot waacayat itchacro. ⁶Etar bawoy cuitar ima chiwa cuisa quinientos bin ubot waacayat itchacro. Itchác eyin quir bin cuar eyin sicar cahujín to binra sácatiro. Cuat cahujinra bar sácjacro. ⁷Etar Santiago ubot waacayat itchacro. Etar Jesús ima chihotá ehcuquin ubot estají waacayat cat itchacro.

⁸Etar ubar ojcor as ubot cat waacayat itchacro. Buwachcuar anto tihrti cuat yehnár eyta as cat anto ey chiwa yehnti cuar Jesusan as ubot

waajacro. ⁹Asan Sir chihotá ehcuquin cahujín etach batro. Récajian aját Jesús chiwa ruhḡujác etar Sir chihotá ehcuquin cahujín owara cutiro. ¹⁰Etarwan asan bitara yehnjáctara asan Sirat racar rehquít eyta yehn áyjacro. Sirat as racar cuáyari réhtiro. Cuatán as racar etar, asan ey chihotá ehcúc icar chájacro. Ey ehcúc icar ruoy raújacro. Aját canar ruojocan cahujinat ruojóc cuitro. Aját eyta yajcayat ajmár urá yehnari yájtiro. Cuatán Sirat as urá wijac etar yajacro. ¹¹Eyta cuácayat ajátara, cahujínatara ba quin chihotá uchta ehcujacro. Uchta ehcwayat, baatán ey rahjacro.

La resurrección de los muertos

¹²Sir chihotá bahnaquin cucáj acat uchta ehcuro. Jesucristo chinjaquey sicor estají yehnjác chihotá ehcuro. Eyta cuaquir ¿ba cahujinat bitara reht cuayir tew̄qui? Ba cahujinat waquít: “Sácajaquin sicor yina báreyra,” wacaro. ¿Bitara reht eyta tew̄qui? ¹³Eyta uní tew̄quir waquít, sácajaquin sicor yínajarir waquít, Jesucristo cat sicor estají yéhnajar binro. ¹⁴Eytair waquít, Jesucristo sicor yéhntiir waquít isat chihotá cuayar ehcuro. Baat cat Jesucristo chihotá cuayar rahjacro. ¹⁵Acsar cat sácajaquin sicor yínajarir waquít, isat sucuar tew̄íc chácata binro. Isat wajacro: “Sirat Jesucristo sicor estají yehn áyjacro,” wajacro. Cuat uw sácajaquinan uní sicor estají yínajarir waquít, Sirat Jesucristo cat sicor estají yehn ayti jácata binro. ¹⁶Uw sácajaquin sicor estají yínajarir waquít, Jesucristo cat sicotra yehnti jácata binro. ¹⁷Eyta bira Jesucristo sicor yéhntiir waquít, baatán eyat yajác chihotá cuayar cájacro. Jesucristo tamo cuayar síhḡaro. Jesucristo uní yéhntiir waquít baan ur ay bár yajác ques cuécwata binro. ¹⁸Sácajaquin uní sicor yínajarir waquít, bíyinan Jesucristo chihotá rahcuír sácayatan, eyin ajc cat sibár cat icúr bár, bi bár rehquíc wacátaro. ¹⁹Is sacac acat étana Jesucristoat is síwatair waquít, is sacar yahncutra síwajarir waquít, isan cuean uw bahnaquin cuít chácata binro.

²⁰Ba cahujinat “sácajaquin sicor yínajar,” waquíc cuaquir, Jesucristoan sácajaquin sicar bin sicor estají yehnjacro. Eyta yehnjác étarwan sácajaquin cahujín cat estají yináyqueyra. ²¹Ser ubistán biyat ur ay bár yajác tayar ques is bahnaquin sácataro. Im eyta cat Jesucristo im istir yehnjác cuitar cat, sácajaquin estají yinátaro. ²²Is cohtá Adanat ur ay bár yajquír is bahnaquin sácata eyta, Jesucristo chiwa rehquít isan sicor eyta yinátaro. ²³Bahnaquin cab istán cuitar yina báreyra. Récaji Jesucristoan sicor yehnjacro. Ey yahncút Jesucristo sicor cajc uch cut wicayat owár, ey uw cat yináyqueyra. ²⁴Etatan cabar bar tináyqueyra. Cabar tinyat, Jesucristoat carin cat, oyin cat, rusamin cat, gobiérnoin cat bahnaquin sutáyqueyra. Sutír cuitar ima gobierno Sir im at icar Tet im at icar chácayqueyra. ²⁵Jesucristoan récaji uw cara chácayqueyra. Quehsí bin bahnaquin sutíc ocoo cara chácayqueyra. ²⁶Ubar ojcor uw yar ayquib cat sutáyqueyra. ²⁷Sir carit cuitar Jesús ojcor wacaro: “Síratan Tetatán eyan bahnaquin acu cara chájacro,” wacaro. “Bahnaquin” wácayat, Sir ima Tet ima ojcori wátiro. Im ajc cutar Jesús

bahnaquin acu cara chajac etar im acui cara chátiro. ²⁸ Cuat Sirat ima wacjá at icar bahnác chac tihír cuitar, wacját ima cat Sir at icar chácayqueyra. Sirat récaji uwan im wacjá at icar chájaquinro. Ey yahncút wacjá sicor Sir ima at icar chácayqueyra, Siran bahnaquin acu caran cuít rehcayta acu.

²⁹ Cahujín anto rih sar siw̄ ti cuat sácáro. Eyta sácayat sácajaquin chiwa bahjáquinan sácajaquin acu yajquín sihw̄ar, imár rih sar siw̄ ayro. Eyta yajquír cuitar uwat sácajaquin cat rih sar siw̄ jác eyta síhw̄aro. Cuat ba cahujinat sácajaquin sícotra yínajar wacaro. Sácajaquin sícotra yínajarir waquít, sácajaquin cuitar yajquín sihw̄ar rih sar icúr acui siw̄ ájatro.

³⁰ As tamo cat síhw̄awi. Uwat búcoyan búcoyan as yauwin ahnúc tacat, ajatán Sir chihotá wácati ehcuro. Sácajaquin sicor yínajarir waquít, ajatán éytara ehcuti waca tétaro. ³¹ Baat as chihotá cuitar Jesucristo chihotá ay cácyat, isan rabir waajacro. Asan ba owár ahnian cuít rehcaro. Eyta bira ba quin uní wacaro. Riy istiy, riy istiy, asan yauwin ahnúc cuar, Sir chihótán ay ehcuro. Cuat sácajaquin sicor yínajarir waquitra, éytara éhcwajatro.

³² Awan Efeso pueblo cuitar uwat as ruhw̄ áy yinjacro. Cohtocuat ruhw̄ úr eyta as eyta ruhw̄ áy yinjacro. Eyta ruhw̄ayat, as tan újacro. Cuatán sácajaquin sicor estají yínajarir waquít, as cuayar tan újacro. Sácajaquin sicor yínajarir waquít uw chihotá uch uní wacátaro. Uwat wacaro: “Inic boni bay cuanyat isan bar sácata chíhtara isat ira cat, sima cat bachuti yayay yinátaró.” ³³ Ey waquíc chíhtara cati jaw̄ i. ¿Ba cayar yájcajaqui? Uwat wacaro: “Urá ay bár binat cahujín quin ur ay bár yajc ayro,” wacaro. ¿Ba quino cat ur ay bár yajc áyajaqui? ³⁴ Ba cahujinat Sir chíhtá istiti binro. ¿Bitara reht ey istítiqui? Eyta bira yají síhw̄awi. Ur ay bár yajquíc etwi. Aját ba quin eyta wacaro. Ba cue rehcayta acu eyta wacaro.

Cómo van a resucitar los muertos

³⁵ Ba cahujinat táyota óraro: “¿Sácajaquin bitara yinátaqui? ¿Chein bitara quir yinátaqui?” táyota óraro. ³⁶ Eyta táyoyat cuayar tew̄ro. Sácajaquin bitara quir yinata chíhtá sinin acu uch síhw̄awi. Behmár ira cucú ricayat, ica tan cut rijác um eyra ohnátaro. Cuat óhntieyra, yehná báreyra. ³⁷ Cucuá ricáyatan, sura rítiro. Sura riti cuar cucuí ricaro. Ub chácayta acu cucuí ricaro. Ritút cucútara cucú istíytara ricaro. ³⁸ Riquír cutar Sirat sura ey chac ayro. Sir ima chíhtá cuitar sura ey bitara yehnatatara ey yehnro. Icúr cucú ríctara, sicor cat im eya yehnatáro. ³⁹ Sura istiy cat, istiy cat ajquitro. Sura bahnáquinra owara quiri batro. Uw cat sura ajquitro. Bowar ruwa cat sura ajquitro. Ectari ruwa cat sura ajquitro. Rih ruwa cat sura ajquitro. Istiy cat, istiy cat sura ajquitro. ⁴⁰ Cuacúr abá cuitar bi cat sura ajquír bin quir binro. Cuat cajc uch cuitar bi sura ajquír bin quir binro. Cuacúr cuitar itquin itit cat, ay biyan ajquitro. Cajc uch cut itquin itit cat, ay biyan ajquitro. Bahnác owárai bár cuar ajquír quir binro. ⁴¹ Rahs churot cat ajquitro. Sihyór churot cat ajquitro. Cuacúr ub cat ajquitro. Cuacúr ub istiy cat, ub istiy cat ajquitro. Bahnacan owárai batro.

⁴²Sibár cat, ojca cat, churot cat, sura cat ajquír rehquír eyta sácajaquin cat sicor yinyat ajquír eyta rehcáyqueyra. Sibará ruhjaquey ohnátaro. Cuat sibirá sicor yéhnayatra eyra ohná báreyra. ⁴³Ay bár ey uwat ruhcuátaro. Cuat sicor yehnyat uwat ey tamo ay séhwátaro. Chein ruhjáqueyinra ajcá batro. Ria batro. Urá batro. Cuat sicor yínyatrun ajcan urán cuít chácataro. ⁴⁴Sibará ruhjáqueyan im uchta binro. Cuat sicor yínquinra Sir ima ajc chi camur chi bow̃ chi yináyqueyra. Sibár cajc uch cut bin cat chero. Cuatán sibár istiy yahncút eyra Sir ima ajc chi bow̃ chiro.

⁴⁵Sir carit cuitar wacaro: “Uw récajian Adanan, estají cuanjacro.” Cuat Adán yahncút bin Jesucristoat ima ajcan chihtán cuitar uwan estají yin áyjacro. ⁴⁶Ajcan chihtán cuít binan récajira chátiro. Cuat sibirá uchta ria bár eyan récaji chájacro. Etar yahncutra ajc chi bow̃ chi bin chájacro. Yárajár bin chájacro. ⁴⁷Récaji eyra cajc uch cut binro. Tamar sicar bin órojoc binro. Cuat yahncút bin eyra cuacúr binro. Sir owár binro. Jesucristoan eyro. ⁴⁸Sera tamar sicar órojoc bin eyta, cajc uch cut bin cat éytaro. Cuat sera cuacúr Sir owár bin eyta, cuacúr beyata bin cat éytaro. ⁴⁹Isan ah ricar cuitar Adán tamar sicar órojoc ojcan wanro. Eyta cat chácajareht isan Sir owár béyata binra Jesucristo urán wan sibirán wan rehcáyqueyra.

⁵⁰Rábinu, aját ba quin wacaro. Ijmár sibirá uchta eyra Sir owár bitách chácajatro. Is ojc ohnata bin eyra yárajár bin owár bitách ítajatro. ⁵¹Cuat uch rahcwi. Chihtá récaji istiti bi, aját ba quin ehcuro. Is uwa bahnáquini saca báreyra. Bahnáquini sácati cuar cahujinra aráyqueyra. ⁵²Cabar rubar cuhcayat acat, isan cab rehti aráyqueyra. Rubar cuhcayat acat isan bar aráyqueyra. Ub suhwo yajquír eyta is cat cab rehti eyta aráyqueyra. Uchta cuácayat, aráyqueyra. Récaji cabar tinyat rubar cuhwáyqueyra. Eyta cuhcayat, sácajaquin sicor estají yináyqueyra. Ohnti ac yináyqueyra. Isan eyta arír yináyqueyra. ⁵³Sirat sibár ohnata eyan sicor ohnti acu arín waquír chájacro. Uw sácata eyan sicor sácati acu arín waquír chájacro.

⁵⁴Etar sibár ohnata bin sicor ohnti ac aryat, uw sácata bin sicor sácati acu aryat, étatan chihtá récaji ehcujacan caba chácayqueyra. Uní wajác chácayqueyra. Sirat wacaro: “Uw sac ayti siwin acu aját burbar yajcaro. Ajmarát sac ayquib bihtín bahnác bar sutchacro. ⁵⁵Yar áyquibu, ¿ba cuayir waátaqui? Ahra bahat uwa rúhwátaro. Chin áyquibu, ba tan sihwát, uw yarsa cuácata síhwáro. Eyta tan sihwát cat uw bitách cuácajatro.” ⁵⁶Sir ub cahmor ur ay bár yajcayat ojcor yar áyatáro. Bíyinatán Sir chihtá caba yajti cuácayatan, bíyinat Sir tayar yajcayat, sácayqueyra. ⁵⁷Etar Sir tamo ay síhwátaro. Sirat Cara Jesucristo ajc cut, is siwin acu sac ayquib bar burbar yajacro. Eyta cuácayat Sir quin “oquéy” wacátaro. ⁵⁸Rábinu, eyta chihtara urá tehmoti ítuwi. Sir chihtá wácati jaw̃ i. Tehmoti wácati Jesucristo chihtá acsar ay siw̃ i. Jesucristo acu eyta ruóctara, cuáyari rúojotro.

La colecta para los hermanos

16 ¹Sir uw quin ray racar wícata ojcor waquinro. Sir uw Galacia cajc cut itquin quin aját yajc ayir eyta, baat cat eyta yajw̄ i. ²Semán istiy icar, semán istiy icar, récaram ricar cuanyat ba istiyát cat, istiyát cat racar wiquin acu bajcá ajquír chaw̄ i. Sir urá cuit ba bita sécuactara ey cahují racar wiquin acu bajcá ajquír sécuawi. Eyta sécuayat as ben cahmor erar yajc chaw̄ i. As biquic cahmor yajc jácayat, as ba quin cucayat bitani sécuajatro. ³Etar as ba quin cur car, aját ba sicar bin cahujín at cut raya Jerusalén áyinro. Baat ítitan, bíyinat tehmoti yajcátatara aját eyin at cut ray cat carit cat áyinro. ⁴As cat Jerusalén beta réhcyeyra eyin as owár beyata óraro.

Planes de viaje de Pablo

⁵As ba quin benro. Récaji asa Macedonia cajc cut Sir chihotá ehcwót benro. Etar acsar ba quin cuwinro. ⁶Ba quin cur ba owár birá ítata óraro. Ba owár bara waaquíc acat ítata óraro. Ba owár eyta ityat, baat as acsar áyata óraro. As birar béntara acsar áyata óraro. ⁷Asan ba owár erar birá it cun cuaquir, áhajira bitách ítajatro. Sirat ajc waáyeyra, semar itay cuwinro. ⁸Ahajira Pentecostés ricar waaquíc acat tas asa usár Efeso pueblo cut ítinro. ⁹Usár Sir chihotá ehcú cuitar siw̄ i cuitar cab cujacro. Uwat ey rahcuí cuitar cab cujacro. Sir chihotá quehsí bin cat ricán toro. Eyta cuácayat as récaji usár echí ítinro.

¹⁰Cuatán Timoteo ba quin béyqueyra. Eya erar cucayat, ey obir yajw̄ i. Aját Sir canar yajquír eyta, eyat cat eyta yajcaro. ¹¹Eyta bira ey ajcá bár yajti jaw̄ i. Cuat ey sicor racayat, ey ohbac aywi. Asa Timotéoin sicor behquic acor ítinro. Eyta bira as quin sicor ohbac aywi.

¹²Apolo ojcor cat wacaro. Aját ey quin seo wajacro: “Apolou, bah cat Timotéoin owár coríntoin quin biwi. Eyin quin bítira yati jaw̄ i,” wajacro. Eyta waquíc cuar Apolo imát sehwat: “áhajira bitách bejer,” séhw̄ ajacro. Birá cuanyat cay bár cuácayat bétaro.

Saludos finales

¹³Yají ítuwi. Sir tamo urá istaná cuitar síhw̄ awi. Ay wini rehti ítuwi. Urán cuít chaw̄ i. ¹⁴Icúr yajcátatara, bahnác uw sehnác rehquít eyta yajw̄ i.

¹⁵Rábinu, baat itit cat, aját itit cat, Estéfanas owár ítquinan récaji Sir chihotá cájacro. Acaya cajc cutara anto cahujinan Sir chiwa yinti cuat eyin Sir chiwa yinjacro. Yinír cuitar éyinat Sir uw obir yajcáy yinjacro. ¹⁶Eyta cuácayat aját ba quin wacaro. Uwa urá eyta bin chihotá ay rahcwi. Bíyinat Sir chiwa cuitar yajcáyatan, bíyinat Sir uw obir yajcáyatan, eyin chihotá cat ay rahcwi. ¹⁷Estéfanasin Fortunátain Acáicoín usár behcayat asan ahní rehjecro. Aját ba bitara ítictara ey rahcti rehquít cuecway raújaquinro. Etar eyin behcayat asan sicor bar tan wanro. ¹⁸Eyin behcayat, as urá cat, ba urá cat ahní rehjecro. Uw eyin tamo síhw̄ awi.

¹⁹Sir uw Asia caje cut ítquinat cat ba tamo sihw̃ac wac ayro. Aquílainat cat, Priscílainat cat eyin usi sécuquinat cat ba tamo sihw̃ac wac ayro. ²⁰Eyin usi Sir tamo sihw̃an ac sécuaro. Rabin bahnáquinat ba tamo sihw̃ac wac ayro. Rahran rahran ay ténawi.

²¹Ahra acsar as Pábloat ajmár at cut cuihsuro. ²²Bíyinat Sir sehnác bártara cab oc icar tiw̃ tétaro. Is Cara Jesucristo in racayta acu aját Sir ojcor conro. ²³Cara Jesucrístoat ba racar reht obir yajcayta acu conro. ²⁴Ajatán Jesucristo ajc cutara ba bahnaquin sehnacro. Amén